

東

華

續

錄

臣朱壽朋敬編

臣沈彭年恭校

冬十月壬午朔時享 太廟遣陳恭代行禮○允河南巡撫劉崑泰奏請鎮練軍步隊一營○甲申祭先賢廟遣長敘行禮○諭國子監司業寶廷奏應訓陳言各摺片○今時事艱難民生困苦朝廷孜孜求治朝夕不遑全在內外大小臣工振刷精神殫心盡職以期共濟時艱若如寶廷所奏部院各臣封疆大吏往往諉卸因循司員屬吏無所畏懼其原在樞臣不敢任咎不肯任怨以致吏治日偷民生日窘怨恟交作災害頻仍等語是上以實求下以名應其何以挽積習而臻治理嗣後軍機大臣暨部院督撫各大臣務當力矢公忠不避嫌疑於用人行政諸大端綜核名實遇事講求以爲屬員倡率中外臣工亦應各勤職守毋得粉飾顛預仍蹈從前習氣至總理各國事務衙門關係中外交涉各件尤在擇人督任該堂官等當考核才品量能授事毋以輕浮貪詐及不知大體之人濫廁其中致滋貽誤○諭李慶翱奏勘明成災州縣請分別撫卹加賑開單呈覽一摺據省本年九早成災民情困苦亟應籌辦賑卹以蘇民困所有勘明成災之祥符榮澤嘉濟源原武修武孟縣洛陽孟津鄆州禹州偃師鞏縣新安淇縣延津

封邱陝州靈寶閿鄉汝州伊陽武陟等二十三州縣著先行撫卹一月口糧其被災九分者極貧加賑三箇月次貧加賑兩箇月被災八分七分者極貧加賑兩箇月次貧加賑一箇月被災六分者極貧加賑一箇月被災五分村莊著貸給一月口糧湯陰林縣等二縣著不論成災分數極貧次貧均賞給二箇月口糧汲縣新鄉輝縣等三縣著毋庸撫卹仍各按成災分數照例加賑該撫卹按照單開各州縣成災村莊分別撫賑務令實惠及民毋任吏胥舞弊用副軫念災區至意○乙酉諭前因京師入秋以來得雨稀少山西河南陝西等省均形亢旱待澤孔殷曾經三次親詣 大高殿拈香並派惇親王奕劻等分詣 時應宮等處拈香虔申祈禱雖經得有微雨尚未深透企望 吳澤賚疾榮懷允宜再申虔禱以冀 上蒼默佑渥沛甘霖本月初六日朕親詣 大高殿拈香 時應宮著仍派惇親王奕劻 昭顯廟著仍派恭親王奕訢 宣仁廟著仍派惠郡王奕祥 凝和廟著派貝勒載治同於是日分詣拈香○以剿除土匪出力予雲南雲州知州章勳承等升敘有差○丁亥諭署巡視中城御史納隆阿等奏例給貧民棉衣錢文查照舊章並上年辦理成案請飭發交實銀一摺著於內務府生息項下發交實銀三千六百兩如長蘆銀兩尚未解到卽於廣儲司存項內先行墊撥分交五城趕緊散放以示體恤○戊子九譚鎮麟奏陝西蒲城等府緩徵本年及前欠錢糧○將軍崇厚等奏 大政殿工程緊要亟須設法修理以肅觀瞻得

旨著就近援照成案敬謹酌度辦理○辛卯 慈禧端佑康頤昭豫莊誠皇太后萬壽聖節 上詣

慈寧宮行禮○癸巳諭銘安等奏三姓地方被災情形懇請量予撫卹一摺本年九月間三姓地方猝遭
風雹田廬被淹旗民醵析離居殊堪憫惻著銘安等將該處被災旗民丁戶妥爲撫卹毋令失所並將伯
彥訥倉存米穀迅卽咨行該副都統提撥接濟一面籌撥銀兩查明發給○諭前因京師入秋以來得雨
稀少山西河南陝西等省均形亢旱曾經迭次親詣 大高殿拈香並派惇親王奕劻等分詣 時應宮
等處拈香虔申祈禱十一日兩雲交加郊原沾潤此皆仰賴 昊慈垂佑實感深謹擇於本月十四日
朕親詣 大高殿拈香 時應宮著仍派惇親王奕劻 昭顯廟著仍派恭親王奕訢 宣仁廟著仍派
惠郡王奕祥 凝和廟著仍派貝勒載治同於是日分詣拈香敬謹報謝仍冀祥雲迭霽俾京畿及各省
一律優霽以迓 天庥而慰民望○甲午劉長佑奏滇省前以餉項支絀等奏蒙 允准在各省設局
開捐遵卽遴派道府各員分省勸辦嗣又奏明凡各省捐生請獎准由各分局就近稟請各督撫奏咨辦
理在案茲據勸辦河南省滇捐局務直隸候補道胡煥葵稟稱捐案會同河南司道詳咨雖較由滇省往
返便易而各司道籌辦本省地方事宜日不暇給其於外省捐案仍恐不免稽延查捐項之興旺全在捐
案之遲速近年部定新章凡捐生攜實收到京領照每項捐案於每月十五日以前咨到方能給照驗看

引 見當此物力維艱各捐生湊集捐資已非易易若令稽候咨案勢必重塞捐路該道奏委直省練銷局務旬稽其繁未便日久遠離豫局文稿移會動至經旬累月無以償該捐生急切邀獎之望惟有變通辦理方資招徠今擬於河南省城派一熟悉捐務委員設局前往並稟請河南巡撫派委員協同勸辦另於周家口及道口地方相度情形設立分局所收捐項由局員詳明該道核實隨時造冊詳請直隸總督代為奏咨以期迅速等情行據雲南捐輸局司道詳請奏咨前來臣查該道係因經理練餉未能達願恐致捐案延誤收辦難期踴躍不能不量予變通合無仰懇 天恩俯念邊陲奇難准將河南捐輸事宜改由直隸督臣代為奏咨以期迅速而廣輸將得 旨如所請行○大學士沈桂芬等與日斯巴尼亞國使臣伊巴里在京師議訂古巴華工條款十六條成其文曰 大清國 大皇帝大日國大君主甚願將中國人民前往古巴寓居之事重新商訂妥協以期永無相左之處為此 大清國 大皇帝特派總理各國事務衙門大臣沈葆楨成夏作為全權大臣大日國大君主特派駐劄中國欽差兼駐劄越南暹羅欽差御賜頭等意薩貝勒等寶星大臣伊作為全權大臣妥議其事所有議定各條開列於後 第一款 所有同治三年九月初十日 大清國大日國在天津定立條約內載立約為憑招華人承工各節嗣後既不招人出洋承工自毋庸立約為憑惟前約第十款內有不得收留中國逃人之語仍遵其舊 第

二款 前約承工出洋未能盡善之情既經今已除去自應將前者議及賠償一層兩國互相罷論 第三款 兩國定准嗣後彼此庶民出口前往無論單身或攜帶家屬皆以出於情甘自願為要總不准或在中國各口或在他處妄用勉強之法及施詭譎之計誘令華民人等不出情願而往如有兩國人民船主人等違背此約者則兩國必將其人從嚴查辦均照本國律例從重定擬罪名大日國又允所有待各大國同類之人最優之處中國人民或已在古巴者或嗣後前往者亦應一體均滿 第四款 中國所開之通商各口如有中國男女人等自願備川資往古巴居住者 大清國自此聽其自便并無禁阻之意並令通商各口關道及地方等官如有遵照此次之約願載該民前往者通商各口關道及地方等官自聽各國之船在該口內自備應用之物以便載客出口所有該船之船東船行及經手各事人等如果能遵守此約通商各口關道及地方官等亦不攔阻 第五款 所有華工出口前往一切情事是否果遵此約各章之處各該口關道及地方等官可自行詳細查明以昭慎重如有華人自願出洋者應先赴關道處報名掛號請領蓋印執照此項執照各關道預先備辦送交日國領事官蓋押蓋印由關道發給該華人上船出洋俟船到古巴後由該處該管官將關道原給蓋印執照送交中國領事官查驗其通商各口載客出洋之船該關道仍可派中國委員大日國領事官亦派委員同往該船親為訪察如查出

華人內有並未領關道所給蓋印執照者立將此等華人撤回儻到古巴後有未領關道所給蓋印執照之華人卽由該處日國官員會同中國領事官商辦至船欲何時出口該船主船東務將開船時刻先期報明以期委員於應查各節詳細驗明不致因循貽誤如該船主不遵此章輒以開船在卽不及候驗爲辭卽照會日國領事官先將船牌等件存署不發並准將該船扣留照日國律例辦理俟各章遵辦後方可放行 第六款 大清國卽派總領事官前往古巴夏灣擊地方駐劄此外所有日國准各國領事官等員駐劄之各處地方中國亦可一律派員前往駐劄惟所有中國派總領事等官一節均照互相訂明辦法辦理日國允待中國各員與待各國駐劄古巴各官一樣 大清國所派之總領事領事副領事等員大日國古巴各官自應盡力照料令其易於稱職妥爲保護在彼本國之民 第七款 所有在古巴中國人等均准隨便出島他往惟其中倘有罪犯應行候訊者不在此例至華民在島隨便來往立業自應設法以與第三款所言之利益相符以上或應由日國執政大臣會同中國駐劄日國 欽差大臣抑或由日國夏灣擊地方官會同中國總領事官妥設良法俾令中國人等均能獲此約所言之益與各大國在彼同類之人一律相待惟所設之法既應與該處防範滋事之章均宜相符卽以後在島再立防範滋事之章亦皆包括又應由日國地方官每人予以隨便往來之准單一紙至此准單自應與各國人所

執之單式標相符 第八款 一中國人等或自被告赴署分辯者或為原告赴署理論者所有該處日
國憲局優待各國兩造之處該憲局應令中國人等一律均沾 一中國人等在憲局有事之時准其延
請律師及傳話之人無論他國日國均准請去且或自覓其人或請中國總領事領事等員代覓均可惟
其人必須按照日國律例能在日國憲局承辦此事方可延請 一至現今在古巴島之華民人等內有
未行互換此次條約之前自言曾受委屈者均可前往該處日國憲局即將各案次序確查秉公斷結與
優待各國人所能得者一樣 第九款 一大清國所派夏灣擊之總領事官並與該島各該管官妥訂
章程令現今在古巴之華民人等以及嗣後再來之華民均皆報名掛號立花名冊其冊存於中國總領
事等官署內每人由領事官發給執照一紙以為業經報名之據此等執照應呈各府城莊寮等所查驗
一古巴地方官總將該島各處現有華人多寡之數並其姓名知會中國總領事等官並設良法令中
國總領事等官易於前往該島莊寮等處以便將中國在彼承工之人實在情形親自詳察 第十款
各國之船願載華民出洋除此約各條一體遵照外尚宜遵守其本國載客之章以免船上或乏應用之
物或缺防客染病之法各等情形各國之船若不遵守此二項規矩即不准載客出洋 第十一款 一
現今在古巴承工之華人內恐有從前在中國或讀書或作官及此項人之親屬大日斯巴尼亞國敦崇

和誼願將此項人等由日國自出船資載回中國以昭誠衷俟此次條約互換後卽行開辦惟應由中國總領事領事等員先將實在情形查明知會日國該處地方官俟該處地方官將各情詳細核明如果屬實卽將其人放行載回 一現今在古巴之華工內所有年老力衰以致不能作工之人並中國孤寡婦女茲大日國允將此二項內自願出島回國之人亦由日國出資送回 第十二款 一現今在古巴之

華工合同期滿原合同內如有僱主人等應送回國等語大日國自應督令該僱主人等按照合同而行 一現今在古巴之華工人等內亦有工期已滿而原合同未載送回本國之語者至此項內誠恐有無力自備船資回國之人應由古巴地方官與中國總領事等官詳商設法以便送回 一所有現今在古巴合同之期已滿之華工俟此次條約互換之後卽應一體予以期滿之執照一紙所有以上第七款所言之利益其人自應一體均沾其人或願仍在該島居住或願出島他往均聽其便 第十三款 古巴島各處地方官倘察某處當時情形其處若衆人過衆恐滋事端以致地方不靖該地方官一面禁止中國人等一面知照領事官不准前往居住與待各國人一律辦理若果有此情形卽不得以第七款有隨便往來之語爲辭 第十四款 一現今在古巴工期未滿之華人仍應按合同之期將工作滿其餘如執照准單等一切事宜新到之華人與期滿之華人所獲利益亦應一律同新 一現今在古巴所有拘

於各處工所之華人俟此次條約互換之後一體放出並將應立之章內所立各項執照亦皆發給總將其人與在被處各項華人一律相待至於犯罪已未定案之人仍送官監候結 第十五款 大清國大日國在此次所立各條內日後如有願行刪改之意則應至少於一年之前預行知會以便日後詳商 大清國如於華民出洋一事內以後若將此次條約未載之利益施及他國則日國即應一體均沾 第十六款 現今所立各條應由兩國 御筆批准於八箇月限內在 大清國都中互換或能先期互換均可右載條約今已將日文法文漢文各二分校對無訛在 大清國光緒三年十月十三日大日國一千八百七十七年十一月十七日由兩國所派秉樞之大臣在京師親各畫押鈐用關防以昭信守○乙未允劉坤一奏運粵米糧准免稅釐○上請 大高殿祈禱○丙申以程誥為都察院左副都御史○丁酉總理各國事務衙門奏 衙門於同治十三年十二月間奏陳出洋委員陳蘭彬訪查華工在洋承工情形一摺以所查華人承工各節極為詳細擬即分致各國使臣查照並咨行南北洋大臣暨各關道知悉將來仍邀各國使臣公同評斷等因復於光緒元年十一月間奏 派陳蘭彬出使美國及日國應國三國辦理交涉祕國日國均有應議華人出洋承工事宜祕國已經李鴻章議有條款日國則自陳蘭彬查復後由 衙門與日國並各國使臣會議曾經 等擬定保護華工條款與各國使臣定期數次晤論

日國使臣丁美霞及各國使臣亦議其條款復將彼此條款參酌合而爲一正在會議適光緒元年春間滇省有戕斃英國總領官馬嘉理一案英國使臣威妥瑪來函以此案未結以前所有與日國商辦各議論此後概不相預等因威妥瑪旋即出京並衙門亦未與各國使臣訂議事遂中止自滇案議結日國使臣伊巴里時已來京歷經臣等定期會議未能就緒本年夏間值日國使臣避暑前往烟臺無從商辦迨伊巴里由烟臺回京來並衙門晤論彼此極力籌辦將從前所議各條目酌核增損議出章程凡十六款彼此校閱畫一定於十月十三日將條款互相畫押其未盡事宜另具照會聲明並訂明所議條款寫漢文法文日文各二分各存其一以昭信守謹鈔錄章程各款及另行聲明來往照會四件一併恭呈御覽如蒙 兪允臣衙門應即照會從前與議之各國使臣咨行南北洋大臣各省將軍督撫出使各國大臣並由南北洋大臣各將軍督撫轉行各監督一體遵照俟互換後再行刊刻成本通行辦理得 旨如所議行○己亥全漕告竣予桂清畢道遠等獎叙有差○諭本年京師夏間亢旱順天各屬收成歉薄現在糧價昂貴貧民餬口維艱且河南山西被災甚重饑民轉徙流離至近畿一帶覓食者諒已不少著順天府體察情形查照上年成案添設粥廠以資賑濟○庚子諭前據御史吳鎮李廷簫奏四川東鄉縣匪徒滋事一案地方官辦理不善等情都察院奏中書肅宗瑀等呈控帶兵官冤殺無辜各節迭經諭令該

督查辦詞據文格奏查明營勇滋事情形復諭令丁寶楨查奏茲據奏稱袁廷蛟原係革役人素狡猾藉口算糧陰圖斂費當其糾眾滋事之初經前任綏定府知府易蔭芝准照舊章征收該犯仍逐日帶領多人沿鄉滋擾前署東鄉縣知縣孫定揚輒以縣城危急稟請剿辦並於議派捐輸戰前任增加致袁廷蛟益肆煽惑提督李有恆等奉派前往初尚按兵不動嗣孫定揚又在官渡設官募勇議抽斗釐致團局被搶袁廷蛟遂率眾撲營當經營勇擊敗鄉民皆疑官兵為痛剿相率守寨官兵亦疑鄉民為拒敵用力圍攻殺戮遂至四百人之多現查明滋事原委分別定擬等語此案袁廷蛟始則藉糧糾眾圍城逼脅官長繼復勾匪燒搶圍困官兵奪去軍裝馬匹嗣又率眾執持器械旗幟在官渡撲營接仗實屬凶狡已極著照所議斬立決以昭炯戒前署東鄉縣慶符縣知縣孫定揚議派捐輸銀兩妄議增加雖尚未征收而辦理不善咎有難辭嗣以縣城危在旦夕張皇請剿以致派撥大兵復以募勇抽收斗釐致激匪眾搶局撲營釀成事端尤為荒謬著卽行革職從重發往軍臺効力贖罪記名提督劉道宗記名總兵雷玉春率勇往攻尖峯寨等處搜索匪首因各寨喇搜行抗拒以致殺傷甚多惟紀律不嚴所部勇丁有搶掠牲畜情事劉道宗復撫谷隨營尤千軍律劉道宗著卽革職從重發往新疆効力贖罪雷玉春著卽革職發往軍臺効力贖罪東鄉縣知縣長廉於前任浮加錢糧不能革除迨袁廷蛟滋事又不能立時拿辦實屬疲軟

記名提督李有恆雖尙無縱容勇丁搜殺姦捕及搗谷隨營情事惟身為統領不能整飭營務於所部劉道宗搗谷隨營及管帶之勇丁毫無紀律均無稽查實屬濫職長廉李有恆均著卽行革職前任綏定府知府易蔭芝於袁廷蛟聚眾圍城未經解散並不查實亦不設法拿辦殊屬顛預原任四川總督吳棠於該縣稟報時不及詳查遽派重兵剿辦辦理亦有未協易蔭芝業經降為通判吳棠業經病故均著免其置議前護理四川總督文格辦理此案尙無不合惟於劉道宗搗谷隨營一節先未查出亦屬疎忽前已有旨交部議處著毋庸再議○賞京師八旗及綠步各營官兵一月錢糧○加賞 實錄館人員例支柴炭外三月銀兩○召王文韶入覲以崇福署理湖南巡撫○賞都察院左都御史徐桐總管內務府大臣帥曾恩承於紫禁城內騎馬○辛丑御史張道淵奏籌運倉儲請暫免米釐允之○壬寅賞給中城勅賜關東城臥佛寺育嬰堂南城打磨廠西城長椿寺碑塔胡同關帝廟北城圓通觀梁家園等各粥廠自十一月初十日起每月粟米三百三十石○癸卯諭前據御史梁景先等奏陝西旱災請飭妥籌賑卹並參州縣不恤民命及藩司將遊學異病各摺片復據都察院奏陝西紳士聯名呈訴該省荒旱撫藩賑開災歉等情先後諭令譚鍾麟確查具奏茲據譚鍾麟奏稱陝西今歲被旱曾派員分赴各屬密行查勘分別災歉先後奏請停征緩征並購買米糧勸辦捐賑刊刻辦理荒政十條示諭未敢玩視民瘼韓城等處匪

徒倡亂派兵捕拿並非妄殺無辜亦無調兵自衛之事等語覽奏尙無不合該撫惟當於救荒事務次第舉行悉心經理俾窮黎獲濟實惠用副委任該省被災困苦庶念殊深著戶部卽行撥銀五萬兩解赴陝西賑濟交譚鍾麟核實散放用示體恤如有不肖州縣營私舞弊於荒政漠不關心卽著據實奏參以重民命另片奏遵查藩司參款並無實據等語將擬學病既痊愈人尙和平且查無專任家人余姓及催租派捐等情著毋庸置議○諭御史張觀準奏平糶米石請嚴禁就近採購一摺前據李鴻章奏飭道員米其昂等赴南省購買米石運至京師設局平糶茲據張觀準奏稱風聞直隸委員竟有在京畿一帶採購並有購及京中倉米者以致市肆價值愈增等語如果屬實於民食轉有妨礙著李鴻章確切查明嚴飭委員不得在直京州縣採買米石一面遴派委員於天津海口認真稽查必須米自南來始准給以照票送至通州仍核其米數是否相符並飭步軍統領衙門順天府五城派員於該管地面平糶米局同往監視如有以京倉米糶者卽行查辦以昭核實○甲辰沈葆楨奏據無錫金匱二縣紳士奏鳳翔等聯名呈稱咸豐十年四月間粵逆竄陷縣城鄉紳民婦女皆深明大義抗節捐軀計有數萬人更有服官外省殉節者亦指不勝屈克復後歷次采訪呈報前安徽涇縣知縣顧翰等凡八十案均蒙量案具奏奉 旨旌卹入祠崇祀此外原任廣西巡撫鄒鳴鶴欽奉 特旨予諡賜卹各在案伏查縣境惠泉山地方已建

有昭忠祠專祀各營陣亡將士惟土著殉難紳民婦女靈爽無依是以職等於惠泉山九峯禪院隙地公
建祠宇二十餘間專祀兩邑殉難紳民婦女名忠節祠現已落成分別製牌入祠擬請列入祀典由地方
官春秋致祭其祭品銀兩按照鄉賢節烈等祠於錫金二縣學租項下輪流動支以彰郵典而慰忠貞等
情呈由該府縣詳經蘇藩司恩錫詳請奏明立案前來臣覆查無異除咨戶禮二部立案外理合具陳得
旨下該部知之○准貴州省城設立軍民待質公所○諭旨國萃奏商販買糧接濟請飭免釐護送等
語本年山西災歉河東運城地方商賈輻輳需糧甚多現由該處商販湊留資本分往河南河陽府之除
旗鎮及安徽潁州府六安州連界之陳州府屬周家口等處採買糧石所有經過之河南安徽關卡該
撫等飭令免抽釐稅並飭各地方官遇有糧車過境派差一體護送以廣招徠而濟民食○乙巳飭湖南
撥提漕米二萬石交湖解管以備賑糧○諭銘安等奏查明三姓地方被災之旗民丁戶確數分別賑卹
蠲免銀數冊單呈覽並請將玩視民瘼之副都統懲處一摺三姓地方猝被水災而應妥為撫卹並蠲銀
穀以紓民力加恩著照所請所有三姓被災十分之旗民丁戶及應蠲銀數該署將軍等即按照冊開各
節分別辦理應給賑卹銀六千三百八十七兩先由該署將軍借款墊發仍著戶部迅速撥解所有運穀
車價著按照民間車腳核實作正開銷伯都訥副都統烏勒興阿於賑濟要務並不趕緊遵辦任意延延

實屬不知緩急著交部議處○己酉予已故總兵陳勝元於安徽太平府建祠○諭沈葆楨奏參劾沾染嗜好各員一摺吸食鴉片何禁禁嚴地方各員宜如何潔身自愛以端士民表率茲據奏稱道員劉咸等沾染嗜好人所共知實堪痛恨江蘇淮陽道劉咸候補道杜文瀾宿遷縣知縣李德溥候補知縣何紹勳李誠均著卽行革職以示懲儆○沈葆楨因病請開缺得旨賞假一月○庚戌左宗棠奏前奏奉

諭旨左宗棠擬俟新秋採運足供鼓行而西刻下已屆新秋著卽檄飭各軍剋日進兵節節掃蕩比卽恭錄行知嗣據總理行營營務處總統馬步各軍三品卿銜甘肅西道甯法福靈阿巴圖魯劉錦棠報稱七月十七日先派提督湯仁和率隊山托克遜進紮蘇巴溝星星子烏沙塔拉一帶前進安紮哨壘至曲惠安營又派提督張春發率隊由伊拉湖小道進至曲惠與張俊會隊均撥員辦草開濬泉井按程預備以待大隊續至二十一日劉錦棠分飭各步隊由大路進自率馬隊各營山小路進二十六日齊抵曲惠詢知十八日有騎賊百餘前來窺探瞥見官軍隊伍卽返馬狂奔二十七日派提督余虎恩黃萬福等率馬步十四營取道烏沙塔拉傍博斯騰淖爾西行出庫爾勒之背爲奇兵二十九日劉錦棠率隊由大路向開都河進發爲正兵開都河源自天山之麓隨而南趨貫庫爾勒喀喇沙爾之中下流注於博斯騰淖爾古所謂洶澤者也自逆自喀喇沙爾過開都河西岸卽雍開都河水以阻官軍漫流汎濫固可百餘里

劉錦棠師至遺崎試探深者滅頂淺者亦及馬背次日舍淖路望藤地進行六七十里一溪前橫深丈許傳令將士砲水運過仍向藤地紆折而前約百二十里方達開都河東岸飭馬步五營搭造浮橋堵塞上流就原來藤地掘修車道九月初一日劉錦棠親入喀喇沙爾地中巡視大城水深數尺官署民舍蕩然無存所有纏回被白逆追脅隨行間有存者隱匿山谷不敢出也劉錦棠諭知碩特台古扎希德勒克速遷所營蒙民數百戶前來以實後路初一日率蒙民嚮導探河身淺處輕騎滅裝亂流而渡沿途民舍均已燒毀亦無居民初三日過哈爾哈阿滿滿馬隊在前突有騎賊百餘斜掠而過騎兵縱馬追斬十餘騎生擒兩賊驗視皆安夷裝束訊之纏回也據供白逆於秋糧甫獲即追纏回悉數搬糧入庫車開官軍將至迫其隨行回性怯弱不敢有違此來爲探官軍進止訊畢斬之是日余虎恩等亦從問道馳至比入庫爾勒則空城一座闕無人烟而行糧已罄後路轉運車駝未至軍無現糧劉錦棠令軍士覓掘窖糧得數十萬斛一面飛催後路轉運接濟一面派員招輯難回此九月初一初三等日官軍收復喀喇沙爾庫爾勒等城安撫難民之實在情形也劉錦棠偵知白逆因策達雅爾洋薩爾兩處纏回及烏魯木齊吐魯番各難回尙有未經盡徙者復至洋薩爾追脅隨行乃於各營步隊挑選健卒一千五百名馬隊挑選精騎一千名作爲頭隊親率以行令道員羅長祜管帶後隊各營及輜重繼進初十日行百七十里駐庫爾勒

次日行百六十里駐紮遠雅爾探報曰逆於日內盡驅洋薩爾回同布告爾即令頭隊炊食二更啟行八十里至洋薩爾但見各村堡火光燭天杳無人聲知該逆臨行放火傳令後隊撲救仍率頭隊即進行一百里至布告爾日已交午報稱回莊之前賊騎千餘排列黃萬鵬等率馬隊進擊賊其少猛撲前來譚拔萃等率步隊趨前接戰騎賊敗卻我軍乘勢追擊陣斬百餘名生擒十餘名至莊西十餘里收隊蓋是日已行二百里矣訊據擒賊供稱曰逆家口已於前十日過此並有悍賊二千護之此間與洋薩爾纏回及烏魯木齊哈密吐魯番各城裹來漢回喀喇沙爾裹來蒙民均經白逆派令頭目驅向庫車此起係磨後之賊等語初十日五更頭隊行四十里瞥見前面騎步數萬以測微鏡瞭之見持械賊不過千餘其餘皆扶老攜幼驅車牽牛雜衆攬集知為賊脅難民劉錦棠傳令手執軍械者斬餘均不問須臾號鼓齊鳴馬步並進賊敗委難民而去甫數里復列隊挺矛以待官軍奮威衝殺賊乃狂奔是日駐營阿爾巴台劉錦棠派陶生林護難民歸布告爾洋薩爾兩處極爲安插十一日馳抵托和奈地方令數十騎偵視回莊有無伏賊遇賊奪門出擒訊之始知白逆於是日逕向庫車竄走莊中蒙回未被荷去者尚萬餘均伏地號呼劉錦棠撫諭安居如常勿庸驚怖是夜四鼓拔隊行三十里距庫車大城不遠聞鎗礮聲官軍急進見纏回數萬散佈郊原訊知皆庫車隨賊西行者賊見官軍至方集隊抗拒劉錦棠令黃萬鵬率隊

畢大才禹中海禹益長李金良馬殿林率旌營馬隊由右譚拔萃賀長發戴宏勝率步隊繼之章洪勝方友升夏辛酉張宗本率馬隊由左張俊胡登花石蘊玉率步隊繼之劉錦棠自率馬隊居中調度羅長祜率後隊馬步繼進騎賊四五千分兩路來拒官軍擊之斃賊已多賊仍死鬪譚拔萃等步隊繼進正盛戰間羅長祜後隊馬步大至橫躍入陣賊始大潰官軍乘勝蹙之追殺四十里沿途賊屍駢列約計陣斃之賊不止千數也自此西行卽度戈壁非搗水不可而庫車繼回急宜安撫遂收隊回庫車撫諭回民令各安堵如故訊擒賊供本日陣前轟傷賊目卽賊中總領馬由布也白逆聞官軍迎到先遣人護谷口西行已爲殿後並嚇悍黨迫脅回衆隨行比官軍掩至回衆不願前進請賊正開鎗轟逼忽官軍大至悍黨乃會所脅回衆以拒官軍不料一敗至此聞白逆裹回衆隨行者何意擒賊供聞賊中計議一使官軍無所資藉難以遠追一欲多裹纏回至喀什噶爾獻之新怕夏伯克胡里爲結納計訊事斬之此九月十二日克復庫車城安撫回衆實在情形也十三日劉錦棠拔隊啟行馳百八十里次日抵扣色爾發報後仍緊向拜城以指阿克蘇將窮賊所往盡力追殺其張曜一軍於九月初旬次第進發張曜料理營後畢中旬亦卽啟行臣以喀喇沙爾本南路八城之一庫爾勒滿城賊匪回被賊驅迫非其本懷應設撫輯營後局籌給賑種待其來歸課以耕牧一面平治道路修造渡船安設驛站以通商旅而速郵傳現委同知銜

留川補用知縣黃繼裕分省補用巡檢顏廷奎作爲喀庫善後撫輯局員攜銀前往妥爲經理其庫車至阿克蘇一帶雖咨請張曜於繼進之便隨時規畫而經理必有專員已飭古城探運局布政使銜道員陶兆熊馳赴劉錦棠軍前聽候差委將來大軍前進局勢日寬克一城卽須設一局委員尙宜預爲遊派庶資差遣也此次劉錦棠率馬步追剿逆回擒斬悍賊雖不過千數百名而自庫爾勒啟行躡蹤奮擊六日夜馳九百里收復喀喇沙爾庫車兩城其餘城堡回莊無數現指阿克蘇拔出被裹回家以十萬計據報庫車一帶糧料充足用價採買嘔吐魯番爲易不但可省轉運勞費並免遲誤戎機尤爲幸事將士感沐皇仁踴躍前驅不辭艱瘁其勞烈實有未可掩抑者應否 恩允存記發獎出自 聖裁其力戰陣亡之記名提督王慶福等十一員應請 旨飭部各照官階從優議卹以慰忠魂 上諭左宗棠奏官軍進規新疆南路克復喀喇沙爾庫車兩城一摺本年七月間甘肅西甯道劉錦棠統率所部由吐魯番拔隊西進回逆白彥虎自喀喇沙爾竄渡明都河西岸纏回均被該逆追殺隨行官軍於九月初一日入喀喇沙爾城並於初三日將庫爾勒城收復白彥虎復由洋薩爾一帶西竄劉錦棠親率頭隊疾馳數百里至布告爾回莊逆匪列隊抗拒官軍奮勇衝擊先後斃賊千數百名於是月十二日克復庫車城其餘城堡回莊收復無數拔出被裹回家以十萬計勦辦甚爲得手仍著左宗棠督飭各軍乘勝進剿將逆首白彥

虎噬日飛擒肅清疆圉此次出力將士准其彙案請獎陣亡之提督王慶福等著交部各照官階從優議卹以慰忠魂又 諭軍機大臣等左宗棠奏官軍克復喀喇沙爾庫車兩城進規阿克蘇情形一摺覽奏已悉本日已明降諭旨宣示並將陣亡各員議卹矣此次道員劉錦棠督率官軍乘銳西進連復喀喇沙爾庫車兩城事機尙順惟逆首白彥虎一意西竄勢將與喀什噶爾之賊合併以圖抗拒若不將該逆擒獲終成不了之局劉錦棠現向阿克蘇跟蹤追勦張曜一軍亦已繼進庫車一帶糧料充足就近採買可省轉運之勞軍士遠道荷戈藉資鼓舞自必愈形踴躍著左宗棠飭令各軍奮勇進發繞前截擊務將白逆就地擒斬毋任遠竄其已復地方應如何派兵扼紮防賊抄襲及如何綏輯練回之匪均著妥為籌畫北路一帶右無匪黨翻山繞越尤恐白逆徑由阿克蘇軍向伊犁著金順懷遵前旨督飭各營嚴加防範毋稍疏虞將此由六百里各諭令知之○是月日斯巴尼亞國新簡駐華使臣伊巴里抵任旋赴暹羅由德使巴爾德哲代

十一月壬子湖總理各國事務衙門奏 衙門奏定出使章程內載出使各國大臣及副使以下各員均自到某國之日起以三年爲期由中國起程及由差次回華行裝歸裝各按照三箇月俸薪銀數支給往返盤費駐紮各國一切經費等項由該大臣按月分晰造報 衙門查核嗣於議擬出使英國大臣郭嵩

難等奏帶隨員摺內聲明各員出洋所得行裝銀兩如有不能得力及緣事未能隨同前往者由該大臣飭令繳回各等因奏准行知遵照在案等語查出使各國大臣等自到某國以後照章應俟三年期滿始能回華給予歸裝銀兩惟其中倘因各項事故未能俟至三年者自應分別辦理等語同商酌除緣事撤回因病開缺人員未滿三年回華毋庸支給歸裝銀兩外如有丁憂身故之員歸裝一項照期滿者給領其回華盤費無論已未三年期滿均准一體開支以示體恤所有副使以下各員並准一律查照辦理至各國出使大臣等自到某國後除本員火食車價跟役工食係由各該員月給俸薪項下自行支給此外一切公用在正開銷其餘隨帶出洋之武弁供事學生每月每人約須白兩以內由出使大臣屆時酌定準數作正開銷等因臣衙門奏准在案此次遣使兩洋事屬創始一切作正開銷款項自難預定然亦須事事核實撙節以免虛糜應請 飭下東西洋各國出使大臣等將出洋盤費及到某國後一切經費凡係作正開銷之款務須遵照奏章俟一年期滿後即行逐款分晰造報 臣衙門查核毋得遲逾 臣衙門各按其每年應用款項若干再行酌中定額奏明辦理得 旨如所議行○癸丑延煦奏熱河地方東北與奉天毗連盜賊之多亦與秦省相埒最甚者莫如平泉建昌朝陽赤峯四州縣朝陽一邑自逆匪李瀕塗等伏誅後漸臻安靖雖尋常盜案未能盡無而總未有嘯聚成羣大肆猖獗者固由大懲之後宵小不

敢生心實賴練軍馬隊常川駐紮有以鎮攝兇鋒之力至於平泉建昌赤峯各場內盜劫鉅案層見疊出
賊匪之恣橫仍前蒙民之被擾實甚奴才自到任後時與旗屬各員往復討論並明查晰訪體察情形蓋
因地方遼闊處處皆山匪徒匿跡之區隨在但是牧令各員所管地方動數百里而捕盜弁兵僅數十名
求其遇案緝獲已屬難得若資以搜訪賊蹤除賊穴雖亦職所應為實屬力有未逮目下情形若不速
作添兵捕盜之舉恐日久養成巨患勢不至重煩兵力多糜帑項不止今日之計惟有先顧大局徐籌長
策溯查同治四年經前都統慶麟奏於熱河前鋒馬甲中抽練馬隊三百名又於同治九年庫克吉泰任
內以二百名改練洋鎗此三百名於駐防兵中最稱可用而技藝之熟精紀律之整肅究有未逮蓋未設
專營常川練習之故也今擬將此項馬隊三百先行仿照練軍之法紮營於郡衛之處令統帶官員與兵
丁馬匹聚處營中按日練習火鎗刀矛各項技藝務使精壯嫻熟遇有調遣聞令卽行不至有張皇遲誤
之弊庶於練兵捕盜二端皆足以收實効如蒙 俞允卽由奴才督飭協佐各員趕緊辦理除現在派出
剿捕者一百五十名外其餘存營之一百五十名卽令逐日操練將來或須添派出營或應抽換輪替皆
由此三百名內設法周轉以節經費其官員兵丁馬匹應支薪水餉乾銀兩統按熱河剿捕匪章程按
月支給作正開銷其餘官兵一千九百餘名將來應如何抽換操練俾兵蹄實用餉不多糜之處容俟奴

才悉心籌畫妥議章程再行奏明辦理得旨如所議行○甲寅諭現在時事艱難全在大小臣工殫心盡職斯夕趨公以冀庶政交修日臻上理各部院大臣受國厚恩自應督率司員恪恭職守豈可稍耽安樂不以公事為重近聞各部院衙門堂官好逸畏勞辦公未能勤慎偶一進署為時太遲不過虛應故事於公事未暇請求以致司員無所懲勸泄沓成風各衙門應辦事件積壓廢弛百弊叢生吏治安能日有起色嗣後各部院衙門堂官務當共矢公忠力圖振作常川赴署不得後時以為司員表率毋再蹈玩愒因循積習用副朝廷宵旰焦勞孜孜圖治至意將此通諭知之○內務府大臣文謙卒賜卹如例○命慶原錢寶廉恭修慕東陵寶城○乙卯諭軍機大臣等潘鼎新奏滇省饑頃艱難自總督劉長佑到任驟添楚營糧餉數倍於滇勇力不能支提督胡中和所部勇多缺額追索欠餉該督有心袒庇營勇驕恣日甚臬司倉景愉於銜參時被親兵揪扯提鎮副參出入必乘綠轎經人告發該督置之不問補署差委於滇省將弁概存意見該督所帶鄉人魏鼎勳等分踞各局越次升遷無以服人鹽法道沈懋榕與魏鼎勳串合鑽營該督之子劉思謙又與沈懋榕魏鼎勳及候補知州李光舒同知潘英章等內外聯絡奔走勢利劉思謙並私娶民人賴姓之女為妾尤為滇人口實等語滇省自兵燹後民物凋殘元氣未復總督為統省表率辦理一切於吏治民心均有關係潘鼎新所奏各節是否屬實著丁寶楨即派明幹大員前

赴滄省詳細查明仍由丁寶楨訪查確切據實具奏原摺著鈔給閱看將此諭令知之○以吉林官軍剿匪獲勝獎叙金福等有差○內辰命廣壽童華查估 天壇工程○戊午諭御史鄧慶麟奏請飭請求吏治一摺本年各省被災地方甚多小民困苦顛連實堪憫惻全在地方官勤求民瘼除暴安良著各該督撫府尹嚴飭所屬州縣於民間疾苦隨時實心訪求凡吏胥衙役有害於民者立即查明嚴行懲辦○已未命刑部左侍郎袁保恆前赴河南幫辦賑務○以剿番陣亡之馬萬邦等交部議卹○李銘樂奏臣本年兩蒙 召見 諭以條陳勿託空言辦事勿徇情面 雖愚陋敢不感激思奮遇事直陳上年豫省河北等府被旱奉 旨飭令先籌賑撫乃聞衛輝府知府李德均據實報災藩司劉齊銜指為恫喝之事群請立予撤任無論被災輕重解糧均限八分之數致道府州縣相戒不敢言災窮民迫於追呼遂至蘊藏但罄裁種未徧忍飢以待收成經撫臣在省城設廠煮粥並散各屬積穀不繼接濟究屬無多今年亢旱如前窮黎困苦更甚通省成災地方已及十之七八竊以為該藩司具有天良必且深悔前失孰料其執意不回變本加厲州縣懼於期限屢為催比點者勒令大戶分完代納愚者逞其武斷肆意刑求致令歉歲餘生賣兒鬻女以完正供存石和泥以延殘喘懸思其狀慘不忍言現聞河南聚有飢民乘機思逞此方驅散彼旋蠱動卽令剿撫合宜是不死於溝壑勢將死於鋒刃向使劉齊銜為民請命先期停徵未嘗

不可固結民心徐圖補救乃竟遲至七月變形顯著始經撫臣李慶翱奏請留京餉漕折銀兩以便賑
需 朝廷先其所急俯如所請而災區催徵仍刻不容緩聞安陽縣百姓有以催比無奈舉家自盡者又
聞濟源令屢報災重情形道府皆恐觸怒該藩司不肯申轉地方大吏職在承宣 德意培養黎元而玩
視民瘼不恤人言至於此極若撫臣李慶翱人尚和平得公正慈惠之藩司本可相助為理乃該藩司悍
愎性成動輿撫臣離離人言藉藉殆非一端 籍隸河南職司糾劾上年奉 命典試廣西及假滿入都
雖未經過省城往返均由該省驛站得聞大概情形茲復證以近日來都者所言適相符合因思該藩司
挾制上司抑勒屬吏以遂其諱災暴斂之非誠不解其何故即請應解各省協餉至急獨不念民靡子遺
餉源益細何難將邊餉荒政酌度重輕早請奏明辦理推其私心不過希冀平餘取盈官宴遂至利令智
昏置股餉民生釀成他變於不問而應據實參劾請 旨辦理以為貽誤地方者戒 上諭河南布政使
劉齊銜於屬員稟報災荒率以捏報詳請撤任並於兩應蠲緩地方照常徵收批解實屬辦理失當著即
革職巡撫李慶翱於府縣因報災撤任無不如詳辦理連年荒歉未能預籌布置亦屬疎忽著降三級調
用不准抵銷○壬戌調涂鍾靈為河南巡撫未到任以前俞李鶴年兼署以楊重雅為廣西巡撫○以裕
寬為河南布政使慶裕為陝西布政使○癸亥以勒方鐸為廣西布政使龔易圖為江蘇按察使○乙丑

諭翰林院侍講張佩綸奏撫臣復奏措辭失當請旨申飭一摺前因陝西紳士呈訴該省荒旱巡撫譚鍾麟有辦理未善之處諭令該撫有則改之無則加勉旋據譚鍾麟陳辦一切情形尙無不合朝廷知該撫向來認真辦事特予優容明降諭旨責成該撫經理救荒事宜用副委任不以摺內辭句苛以相繩致覽張佩綸所奏以該撫復奏內曉曉置辯語多失當恐開驕蹇之漸請予申飭嗣後該撫惟當實心任事恪矢靖共於一切行政用人愼益加愼毋得稍任意氣之偏轉致有虧職守○戊辰諭吳元炳奏丁憂人員請旨飭查勒限回籍等語丁憂人員例應回籍守制近來各省實缺候補各官往往有丁憂後逗遛省城營謀局務各項差使延不回籍竟至習爲故常殊屬不成事體卽著各直省督撫一體嚴查所有實缺候補各員丁憂後如有在省逗遛者勒限令其回籍倘查有僅遣家屬虛報到籍請咨起復者卽行據實嚴參以肅官常而符定制○己巳大祀 天於 園丘遣隆勳恭代○壬申諭侍郎袁保恆奏豫賑緊急請飭部特發花翎藍翎執照爲河南收捐備賑之用給事中郭從矩奏山西開捐助賑請准捐道府州縣四項實官並請飭部頒發花翎藍翎執照交山西巡撫發局收捐各摺片著戶部議奏○加賞普濟堂功德林樹廠小米六百石並經費銀六百兩○左宗棠奏官軍進規新疆南路連復喀喇沙爾庫車兩城仍躡蹤追勦進規阿克蘇並布置後路情形 已於十月十四日馳報茲據總理行營營務總統馬步各

軍三品卿銜甘肅西甯道法福靈阿巴圖魯劉錦棠稟稱九月十五日黎明督率所部由和色爾拔隊進
發行八十里追及尼賊約百數十騎總兵方友升督隊奮擊陣斬五十餘名生擒一名據供此股係白逆
喊令緩行斷後藉探官軍消息者也劉錦棠督隊馳追至拜城地方城外莊堡無人城門半閉但見一二
探頭外望者遣通事告以官軍已至城中頃目乃縋數人出城據稱白逆昨日過此與本城所踞安集延
脾色提及庫車逃來各脾色提督縋頭俱竄本地回目阿克奈木釐不從被殺賊將城外莊堡燒掠一空
裹脅回民與之俱行城內回眾見事急即閉城門白逆攻之未下今早已與安集延脾色提率黨西竄等
語劉錦棠徧加撫慰其大頭目買賣提托呼達乃率小頭目開城詣營乞撫劉錦棠令方友升率騎營馬
隊駐紮城外招集逃亡布置甫定令各營將領尋食急進十六日五更履冰而行霜凌凝積手足凍斃人
馬交困行八十里抵銅廠偵知賊正催眷口渡河即傳令各營結隊進剿見騎賊數百名監押縋回約
二萬餘名麕集河岸立即揮隊猛撲見騎賊即殺人馬之屍頃刻堆積河中水爲不流被裹纏回悉數遣
歸拜城散遣復業復率所部亂流而渡行三十里探報賊在前二十餘里之上銅廠列陣似有拒敵之勢
劉錦棠率馬隊前行令步隊嚴陣繼進賊分兩路迎拒官軍亦張兩翼包之夏辛酉張宗本譚慎典率馬
隊擊其右路席大成戴宏勝領長發率步隊繼之黃萬鵬程偉畢大才禹益長禹中海李金良馬殿林率

馬隊擊其左路張俊胡登花石縑玉率步隊繼之劉錦棠自率馬隊親兵居中調度分布擊鼓齊發兩路馬隊衝殺鎗礮連環施放正相持間右路吳辛酉躍馬衝入賊陣生擒貂衣賊一名所部勇士一齊衝入賊營賊失措官軍馬步相依併力夾擊斃賊無算左路之賊見右路大敗相率奔潰黃萬鵬等馬步乘之鎗礮矛刺賊屍遍野兩路乘勝壓追過察爾齊克台之西三十餘里計斃賊數千名生擒賊百二十六名奪獲戰馬二百餘匹拾獲軍械無算日暮收隊回察爾齊克台駐營提訊擒賊半係陝逆半係安夷訊知白逆本不敢戰因安集延各酋再三促之始噤死黨抗拒因而致敗是日陣擒貂衣賊目訊係安集延分踞阿克蘇之胖色提要路打什也左路賊為白逆死黨右路賊為分踞三城之胖色提等各酋白逆見前賊已敗噤隨身死黨即竄訊畢勒之十七日官軍拔隊復進度戈壁四十里至哈拉裕勒偵知午間白逆甫由此過令各隊小憩片時仍即前進十八日子時抵扎木台師行已六十里解鞍小憩馳薄阿克蘇城未至城數里遙見城頭鎗矛林立西南正西兩面飛塵蔽天遣騎偵探知城內總頭目阿布都喇滿謀率眾投誠被各胖色提縛之西去曰逆亦率死黨回遁城內縛回十數萬則皆守城以待官軍者劉錦棠飛飭譚慎典辛酉張宗本由西南一路踞蹤緊追仍令席大成戴宏勝領長發繼之黃萬鵬羅偉鼎大才禹益長禹中海李金良馬殿林由正西一路旁出截擊仍令張俊胡登花石縑玉繼之一面飭

阿克蘇城頭目出城諭以恩威各回目膜拜乞撫劉錦棠受之入居阿克蘇滿城捕間派出之西南路將領報稱追及賊尼陣斃悍賊百餘名生擒二十三名訊係安夷即於陣前物之其派出之西南路將領同時報稱追至胡瑪納克河適遇悍賊數百騎擁護白逆谷口奔走見官軍奄至合力死拒官軍馬隊突前陷陣步卒踵進立斃賊四百餘名拔出哈密纏回男婦數百口詢知哈密回邁哈默特之母亦在其中遂令暫回庫車候道并護歸哈密而白逆隨行賊谷二千餘名口均拋棄在途亦一併送回庫車靜候安插訊據擒賊供白逆原擬與安集延各酋分路而竄一走烏什一走葉爾羌冀可分兵勢而延殘喘劉錦棠遂決計舍安夷而追白逆飭黃萬鵬張俊馬步兩營向烏什再進並調譚慎與辛酉各率馬隊繞止西一路與黃萬鵬等會隊十九日五更踏冰渡胡瑪納克河行八十里戈壁中擒白逆尼股馬有才等十六名陣前斬之二十日未刻行距烏什城東二十里警賊蹤各營將領張兩翼抄之該逆驚覺拚死狂奔黃萬鵬等馬步齊進斬賊數十名生擒數名奪獲賊馬八十餘匹日暮駐營烏什城外二十一日五更拔隊行九十餘里至阿他伯什地方彌望戈壁杳無賊蹤聞此處有小路可通喀什噶爾計程不過數百里萬山帶脊本徼外荒地不隸版圖訊之土回間有黑利黑斯插帳游牧黑利黑斯者本額魯特種人與生番相似白逆既竄此間應可令其擒獻惟邊內雜虜向與新疆不通聲息烏什土回無從設法劉錦棠雖

擬購續追捕竊以爲難有把握也臣維新疆南路以阿克蘇爲關鍵北通伊犁西連烏什東接庫車迤西達喀什噶爾又可達葉爾羌英吉沙爾稍南而東則達和闐爲形勢所必爭阿克蘇既復該逆竄路悉窮既由烏什邊外逸去非至喀什噶爾別無歸宿所盼大軍圍剿或可聚殲此次官軍浩蕩西征一月馳驅三千餘里收復喀什噶爾庫車阿克蘇烏什四城南疆八城已復其半劉錦棠所部留後馬步八營九月二十五日方抵庫車甫進阿克蘇合隊張曜所部嵩武軍十月初二日方由喀什噶爾進指庫車前茅既銳後勁仍道戎機順迅近罕其比東四城既克和闐葉爾羌英吉沙爾喀什噶爾西四城分攻合剿自有餘力就四城言之和闐回目呢牙子早已遞稟輸誠英吉沙爾葛爾彈丸無能作梗如葉爾羌速下官軍會攻喀什噶爾並規全局似戡定之期當亦不遠矣惟軍情瞬息千變非敢謹將事必蹈危機固有不可輕心嘗試者臣惟當戒懼自恃中儆僚佐慎以圖之以仰慰 宵旰憂勤於萬一此次迅赴戎機諸將士圖報之念非由希倖建功而起而勞烈究難掩抑劉錦棠來稟深以白逆漏逸引爲己咎乞免甄錄竊謂連復四城實劉錦棠及所部將士之力有功必賞古之常經合無仰懇 天恩加以獎叙其疊次打仗陣亡員弁均係冒險赴敵血戰捐軀深堪悼惜伏懇 天恩飭部各照官階從優議卹以慰忠魂 上諭左宗棠奏官軍追剿逆回連復阿克蘇烏什兩城一摺官軍進規新疆南路自克復喀什噶爾庫車各城

後經甘肅西甯道劉錦棠督率所部疾馳西進自九月十五至二十等日將安集延白彥虎各股跟蹤追
剿疊獲勝仗殺賊以數千計連獲阿克蘇烏什兩城並撫各回不計其數師行迅利大振軍威仍著左宗
棠督飭劉錦棠等穩慎進取將白彥虎等逆擒獲速肅大功此次官軍整旅西征於冰霜凜冽彌望戈壁
之中一月馳驟三千餘里收復喀喇沙爾庫車阿克蘇烏什四城前驅已復其半諸將士踴躍用命自應
量予恩施其陣亡之總兵朱成其等均著交部各照官階從優議卹又 諭軍機大臣等左宗棠奏官軍
追剿逆回連復阿克蘇烏什兩城一摺本日已明降諭旨宣示並將出力及陣亡各員均照所請分別獎
卹矣官軍收復喀喇沙爾庫車兩城後此次又連復阿克蘇烏什兩城勦辦甚爲得手惟白彥虎現經西
竄必須將該逆擒拏始無後患著左宗棠飭令劉錦棠妥慎圖維毋任釜底游魂再行漏網一面飭令各
官軍乘此兵威將西四城次第攻克以資全功惟軍情瞬息千變尤當審慎進取不可掉以輕心該大臣
平時辦事謹慎必能計出萬全以副委任也金順仍著懷遵前有督飭各營嚴加防範毋任白逆乘間
北竄前據御史張觀準奏東三省遣撤官兵往往私帶征防處所幼丁回旗請飭各將軍查明出給路照
遺令回籍並飭各省督撫令各州縣於此項難民到籍後妥爲安插繳照日不許吏役需索等語已諭令
各該將軍查辦並著左宗棠飭令地方官於該幼丁回籍時妥爲辦理將此由六百里諭令知之○癸酉

諭左宗棠奏軍務需才孔亟請調員差遣藉資歷練等語前署烏里雅蘇台將軍長順翰林院編修呂耀斗吳大澂著各該衙門飭令該員迅赴甘肅軍營交左宗棠差遣委用吳大澂並著俟辦理賑務完竣再行前往○左宗棠奏扎薩克頭等台吉扎希德勒克於八月中旬官軍進兵以後隨同馳驅其勞績未可掩抑合無仰懇 天恩准將扎薩克頭等台吉扎希德勒克 賞戴花翎以示旌異允之○歐陽雲奏本年九月奉 上諭朝廷政事得失原冀內外諸臣獻可替否宏濟艱難爾大小臣工務當各據己見切實指陳等因欽此仰見 皇太后 皇上勵精圖治遇災修省至意 初任言責罔識忌諱但求有裨於明聖不及自計其狂愚竊維 宮庭爲風化之原而廷 實賴吏之表近來諸 言事有謂專施陽德未必適合 天心恐內外臣工或有徇私圖便蔽 聖聰者有謂應天以實不以文請嚴飭廷 激發天良毋存私見毋徇私情者有謂樞 不敢任咎不肯任怨者無不仰蒙 採納訓誡諄諄夫以時事之艱難如此言事者之激切如此 皇太后 皇上之發勅惕勵如此凡在廷 自當仰承 聖訓力求補救之方念物力之維艱則度支益思節慎名器之慎重則甄敘益致矜嚴念民命之攸關則庶獄益期清理 竊取實事求是之意謹擬四條敬爲 皇太后 皇上陳之一免採辦 前供職戶部伏見上月內務府奏請令四川採辦緞緞綢等件二千九百餘疋查此項向由江浙三織造辦理四川並無辦

遞成案自同治四年以至十二年始行採辦六次光緒二年八月續請採辦經戶部奏請歸織造辦理內務府復於十二月仍請採辦已據四川督臣報解到府茲據內務府奏稱現在解到各款將次用竣而放項浩繁均關緊要等語竊思咸豐三年以後江南織造久虛然十餘年中尙無採辦及四川之事自同治四年始行採辦近則數漸增而為期漸急臣等惟 皇太后 皇上躬行節儉為天下先斷不以不急之需損有用之費或恐該府司員等假 宮庭之用不無支銷浮冒之處該大臣等亦無從查核合無仰請 飭下該總管大臣等督率司員將每年收支數目逐細查核分晰開單呈 御覽以防浮冒而慎度支如 有不敷似可仍歸織造撥大運之數補辦或經費不足即由四川督臣籌款撥給免其採辦益四川採辦既無定價可循又運道維艱不如江浙之便臣亦知 宮庭之用事關緊要即此採辦之數亦屬甚微但恐外間臣民未知其故或疑上用之漸增所關於 聖德者甚大用敢冒昧直陳此實事求是者一一慎獎敘 維軍興以來外省保舉之案多矣 朝廷必令各督撫擇尤保奏毋許濫實於鼓勵人才之中仍寓慎重名器之意但循名核實端自 朝廷始伏讀前日 上諭前因恭纂 穆宗毅皇帝實錄全書過半經該總裁請獎在館人員分別等第奏請獎敘等因欽此臣維翰林院諸臣以纂修為職此次優加獎敘已屬格外 恩施然猶有纂修之勞也至六部司員不過分校對之任比之各衙門辦理

稿案猶爲較易卽謂 典禮攸關議以勞績亦應區別乃有以候補主事免補主事以員外郎無論咨留

選缺卽補並加四品銜者不一而足是以六品而保至四品又有中書科中書以知府不論雙單月選用

俟選知府後加鹽運使銜者是以七品而保至三品計將來全書告竣勢必保至二品而後已查上年吏

部奏定保舉章程內開 實錄館保獎成案每一件內不能均係異常出力故保獎亦有等差又辦理各

項緊要事務尋常勞績每案准保一層異常勞績不得逾兩層今以六品候補之員而保四品且以七品

而保至三品無論其勞績若何已顯肯定章矣臣亦知典禮重大惟 朝廷轉移風化必先自重大者始

大者有制則小者自有遵循 朝廷有法則外省亦知忌憚近日仕途壅滯卽甲班分部十餘年不能得

一缺或得缺十餘年不能進一階今以一二年校對之力躐等至此未免啟躁進之階可否請 旨飭下

吏部按照奏章分別核減並令監修總裁等經此次優獎人員將來全書告成更不得優與獎敘庶以重

名器而防躁進此實事求是者二肅吏治本月初三日奉 上諭現在時事艱難全在大小臣工殫心

盡職斯夕趨公以冀庶政交修日臻上理嗣後各部院堂官務當共矢公忠力圖振作等因欽此臣伏讀

之下欽悚難名敬譯 諭旨之意大臣者小臣之表率率固在勤慎而懲勸尤在公忠近來仕途日雜相

率以迎媚爲能一遇優差夤緣鑽刺無所不至各部院大臣點派差使既不考其賢否校其資序甚至各

存意見互相齟齬於是捐納未久者可得優差而正途資深稍知自重者視若贅瘤又或以優差而得優獎遂可越次升補名曰搶缺夫搶之一事豈可形諸仕途此等風氣若不力圖補救何以勵官方而清流品誠如 聖諭所云務當共矢公忠是為救時至計轉瞬又屆京察之年可否 飭下各部院大臣務存公道以賢否資序為定毋徒以趨承迎媚為工庶司員有所勸懲而吏治漸可整頓此實事求是者三矜庶獄近年各省京控之案層見疊出有聲明在本省督撫司道衙門控告數次並未親提者有曾經京控欽奉 諭旨親提而並不親提訊結者夫小民冤枉雖伸既經控司控院必有奉率州縣官及吏役之處者仍發本州縣官審訊斷無以聽斷不公自甘平反之理而吏役之肆毒更深且官場積習互相徇庇即令各督撫司道親提訊究尙有不能昭雪之處况並不親提乎至於京控後欽奉 諭旨仍不親提訊結是不惟玩視民瘼抑且輕視朝廷若不定以處分何以防徇庇而伸冤獄擬請 飭下 臣部凡有上控數次並未親提及京控欽奉 諭旨仍未親提訊結者分別議以處分俾庶獄得速清理此實事求是者四以上四條雖未必有補時艱然或由此推廣實事求是似亦有補萬一 上諭御史歐陽雪奏陳管見一摺四川採辦錦緞綢等件為內務府應備各費項所需並非宮廷之用惟欵項攸關總宜撙節動支嗣後該管內務府大臣等務當督率司員核實收發勿得稍涉浮冒所請慎獎敘一條此次恭纂 程

宗毅皇帝實錄全書過半典禮重大業經降旨將在館人員優加獎敘將來全書告成即著按照吏部奏定新章詳核辦理以重名器至整飭官方全在懲勸之公各部院大臣等若均以賢否資序爲定不以趨承迎媚爲工則實心任事者自必奮勉從公踈進者亦可改弦易轍吏治庶有起色近來京控各案層見疊出各省督撫如限奏結者固多而延擱未辦者恐尙不免仍著遵旨親提秉公訊結以副朝廷矜疑庶獄至意○諭京師入冬以來得雪稀少農田待澤孔殷深寅盼朕於本月二十四日親詣 大高殿拈香 時應宮著派惇親王奕誼 昭顯廟著派惠郡王奕祥 宣仁廟著派貝勒載治 凝和廟著派貝勒載澂同於是日分詣拈香○甲戌御史彭世昌奏 朝廷取士首重甲科多士幸入詞垣重以散館考試高等則授職編檢次則分用部屬次則銓選知縣求才實用內外分司法至善也乃近日各部候補司官多者數百少亦不下百數十員加以保舉捐輸插補插選以致正途到部者求補一缺踴需一二十年吏部雖有選班亦非一二十年不能輪到壯年通籍則白首爲郎暮齒分曹則半途去人才抑塞欲進無由似不如按例變通俾得及時自効考唐宋制科待士必先授以丞佐判官等職使之練習吏治洞悉民情誠以士人學古入官必須民社躬膺周知利弊庶他日爲有用之才今進士榜下分部者准其改就知縣歸班銓選者亦准其呈請分發省分而獨散館部屬一途尙未變通辦理可否 飭下吏部議定章

程散館歸部人員准其呈請改就知縣附於本年散館卽選班末依次銓用每科不過數人於班次不致
窒礙而正途日見疏通似於求才實用之道不無裨益下吏部議奏○李鴻章奏山西今年大旱成災仰
蒙 特恩續撥山東漕米八萬石以資賑濟會國茶因運費無出請借東省庫款銀六十萬兩為轉東漕
及江廣漕米之需業經文格覆奏借給銀十萬兩奉 旨著解交臣發給轉運局濟用等因欽遵在案伏
查文格所奏借撥六十萬兩未能如數籌給本屬實情惟東漕八萬石運至山西無論南路北路相距皆
遠且山道崎嶇艱險計每石運費至少亦需銀三兩共需銀二十餘萬兩皆旱非一年物力傷耗財源
枯竭截留京餉早經弊盡奉撥部津各款亦皆支用無餘飢民至四五百萬之衆待哺嗷嗷竟有朝不保
夕之勢會國茶值此奇荒無從羅掘閻敬銘以客官督查賑務更難為無米之炊直省瘠苦著名地方亦
值災歉前已避 旨設法籌濟督賑銀二十四萬兩不敢稍留餘力疊接會國茶咨兩屬 就近派員籌
辦轉運專指東款借到俾應急需今僅十萬兩不特江廣新漕運費不繼卽東漕一項亦尙短十餘萬兩
大宗賑米不能入災黎之口殊無以宣 皇仁而慰民望臣夙夜籌維難安因思東省之力六十萬
鉅款固難全籌而斟酌通融原不可以十萬為限文格公忠體 國大局關懷素無畛域之見臣與往復
臆商該撫臣亦知原借十萬不敷轉運深為踴躍救災卹鄰之念溢於楮墨竊以民命至重賑務至要

既奉 命經理運費又經會國茶屬籌捐運呼籲求助誼不容辭相應仰懇 天恩敕下山東撫臣文格

寬籌東河運費移緩就急迅速設法添借俾表撥賑糶八萬石可到督省災區接濟窮黎口食俟籌定後

臣卽飛商閩敬銘會國茶遣派大員前往與山東糧道核驗會辦轉運事宜約計年內徵兌開春起運該

糧道通達政體勇於任事必能妥速共濟至此次續借之款連已借之十萬兩仍由督省分年籌還以符

會國茶原議又奏 命兼籌督賑捐務災區既廢時日又長非廢勸捐助誠恐杯水車薪不足以資

接濟除天津上海漢口寧波各處爲商賈輻輳之區業經咨行地方官設局勸捐已據官紳陸續籌湊尙

未集有成數查有廣東潮州府地近海濱紳商向多好義急公因函商福建撫臣丁日昌就近諄囑該處

官紳廣爲集腋茲據惠潮嘉道張鏡寰稱接札後卽親自馳往汕頭勸辦該處紳商肯踴躍從公義形於

色卽經同知銜儘先選用知縣林士麒邀同職員楊炳昭蔡由貴侯亦謙盧衡等極力設法計共捐洋銀

二萬圓合銀一萬四千兩其餘菴埠澄海各屬尙多樂善好施之人查有福建補用知府候補同知郭廷

集明幹有爲堪以隨同該道前往勸辦其香港新嘉坡安南暹羅等處潮人貿易尤多查有候選知府柯

振捷候選同知高廷楨深明大義勇於爲善於各該處情形尤爲熟悉可以商派妥實員紳前往勸助以

期多多益營仍祈酌發執照實收到潮以示大信而廣招徠等情前來 伏查潮州水旱連年民情拮据

尙復不分畛域籌集鉅款以賑鄰饑實爲好義可嘉惠潮嘉道張銑履任十餘年士民愛戴是以此次勸捐籍有成效所有在事勸捐出力員紳應俟續捐數目盈絀再行分別從優請獎以示鼓勵並咨山西撫臣曾國荃將部照先行的發仍咨會廣東督撫臣一體飭遵得旨如所議行○乙亥劉坤一奏解固本餉銀四萬兩下戶部知之○戊寅諭何以崑保亨奏總兵積勞病故懇請優卹一摺已故廣西右江鎮總兵麥龍翰自咸豐年間投効軍營從征廣東廣西福建浙江江西陝西甘肅等省身經數十戰光緒二年復至臺灣助理撫番事務力窮險要備歷艱辛旋因感受瘴氣在營病故殊堪軫惜麥龍翰著交部照軍營立功後病故例從優議卹○庚辰諭醇親王等奏玉牒告成應行恭送尊藏盛京本裝潢完竣奏聞一摺現值恭纂穆宗毅皇帝實錄聖訓著俟告成時一併恭送盛京恭藏○命李元華開缺來京另候簡用以余思樞爲山東布政使吳德潤爲貴州按察使

臣朱壽朋敬編

臣沈彭年恭校

十二月辛巳朔上詣 大高殿拈香○沈葆楨奏三代以上庶人在官者與士同祿漢制往往山小吏至公卿故循良稱極盛所學卽所用也自晉人重門第變風俗相沿至今夫芝草無根醴泉無源不問其所出與求才初意兩不相謀然指倡優爲身家不清彼誠無以自解若供役公署者雖風塵奔走勞瘁不堪究其所遂日營營者非 國事卽民職固天下之所必不可無者也乃不待其作奸犯科而先絕之於人類於求治之意毋乃左乎況不嫻文理者無以爲作任不精武藝者無以爲馬快屏之於不齒之列而望有出類拔萃之才起而應之者乎命案全視屍傷爲準屍傷一舛雖旱陶無由得其情洗冤錄一書其理極微又有不盡一一可憑者須以意會之在由科甲及幕友入仕者日夕研究猶懼其難再以不自愛之作作顛倒是非含冤其誰訴乎有終身不見賊之兵無終身不見賊之馬快秦寧緝捕其危險與臨陣同若罷慢無能安望其爲鷹爲鷂固不肯成盜藪乎說者謂作以命案爲市馬快以盜案爲市今再予以出身不當養虎而傳以禦夫天下未嘗無包攬詞訟之生監不因此而廢士之出身未嘗無騷擾閭

聞之亦勇不因此而廢兵之出身賢不肖各以類分進其賢者退其不肖者而已矣若並賢者而錮之是
驅之出於不肖也又何誅焉其品甚卑其才甚劣而其權則甚重者不至於惟利是視無惡不作也幾希
現查各省有一縣全無件作命案報驗借諸鄰封遇有應行開檢者則束手無策馬快多不足額其濫
卒充數者非能通曉技藝遇有巨案亦束手無策竟無認真公事之令欲破格召募而相需甚殷相遇終
疏蓋稍有微長者甚不願終身自棄兼使其子孫亦無罪而爲 聖朝所棄也合無仰懇 天恩飭部核

准將件作照刑科書吏一體出身馬快照經制營兵一體出身俾激發天良深知自愛養其廉恥竭其心
力庶命案盜案本源易清倘仍作奸犯科自有加等懲辦之法在下部議奏○壬午諭前因京師入冬以
來雪澤稀少朕於十一月二十四日親詣 大高殿拈香並派醇親王奕誼等分詣 時應宮等處拈香
虔申祈禱迄今又將旬日尚未沾沛祥雲倍深寅盼本月初四日朕仍親詣 大高殿拈香 時應宮著
仍派醇親王奕誼 昭顯廟著仍派惠郡王奕祥 宣仁廟著仍派貝勒載治 凝和廟著仍派貝勒載
澂同於是日分詣拈香○李鴻章奏前因直境荒歉糧少來路編修何金壽奏請於京城設局平糶奉
旨飭臣妥速籌辦當經奏明轉飭輪船招商局道員朱其昂等籌借資本赴南省趕購大米轉運京城擇
地設局試辦平糶奉 旨著俟糧石運到酌度辦理等因欽此其時距封河僅及一月遵飭朱其昂等趕

在南省採購山輪船跟接運津計至封河截數連直省兩省賑糶所需共運到白米十餘萬石顆粒皆自南來擬分撥三萬石爲京城平糶之用雖爲數無多實爲時所迫該局員輩均係南人於京中情形不熟稔經直札派直隸候補知府卞桂孫通判陸祿等前往代爲經理據報已在正陽崇文門外西珠市口欄杆市等處擇定局所次第布置並擬朱其昂等招僱船車將米石陸續由津運抵通州正開辦尙適御史林拱樞奏請在城外設局經戶部議復照行直隸城外地方荒僻村落零星糶食之人遠不如城內之衆現又於六門外添設粥廠貧民已盡廢餉口則待糶者益少城內居民相距較遠出城赴糶難且從前道光年間東城外定福莊曾有夥搶官糶巨案蓋荒僻之區匪徒易生覬覦兵役力不能及遂致失事此次係招商局借款經辦該局本無餘力祇以事關根本民食不得不竭蹶兼營近來城外搶劫頻聞糶局設有疏虞商本卽歸烏有亦非體恤遠商之道也再四遵行酌度城外設局利少害多不如仍照原議在正陽崇文門外一帶設廠平糶人煙稠密之地既可便民而各地官弁兵役亦得就地照料防範似較周妥至倉米不准出城本有官役查察無虞城外居民因此偷漏也又恭查乾隆五十二年撥發京倉米石平糶案內欽奉 上諭於五城內外揀擇殷實大鋪戶各一處將官米交給該鋪戶自行糶賣仍官爲酌定價值令其稍沾餘潤所有賣出價值卽隨時交納等因嘉慶十五年十八年京城兩次平糶麥石皆

仿照辦理欽奉 上諭交銷領事節簡易著派出之鄉員會同五城御史查照舊章訪查販賣銷戶承領糶賣城內外均勻分撥等因咸豐七年欽奉 上諭著戶部籌款發交順天府尹購買米麥運京酌定價值准令米鋪承買其出糶時每石酌加京錢一二百文俾商民兩便糶石不致缺乏等因均經欽遵辦理有案誠以交銷承買出糶毋庸另設局廠可省經費之繁仍得不價之益該銷戶等人地熟習照常糶賣亦免意外之虞相應請 旨飭下步軍統領順天府尹五城御史會同體察情形妥速核議如正陽崇文門外可以舉行則局所已經擇定米亦運抵通州即應用局試辦抑或欽遵歷奉 諭旨將招商局現運到大米三萬石由五城御史查明城內外販賣糧店令照招商局原辦價腳各銷勻分承買仍官爲酌定售價使其稍沾餘潤自行出糶市價或可稍平該銷應交買價即飭交糧桂孫葉收解交招商局歸款來春開河後如青黃不接仍可察看情形飭該局購運接濟 上諭李鴻章奏京城試辦平糶擬仍照原議在正陽崇文門外設局辦理或交糧鋪承買出糶請飭各衙門會議一摺著步軍統領衙門順天府五城御史會同體察情形妥速議奏○癸未諭毓楹等奏直隸各州縣欠交永濟庫租銀請飭催等語永濟庫支發款項全賴各州縣徵解租銀接濟乃近來直隸遵化薊州豐潤三河玉田等州縣欠解新舊租銀爲數甚鉅實屬延玩現在各處待放各項需款孔亟著李鴻章即飭藩司詳查各州縣欠項勒限嚴

催務合設法徵解以供支發○乙酉 上詔 奏先嚴行禮○江西巡撫劉秉璋奏據布政使李文敏詳
據饒州府轉據鄱陽縣進士吳冠亭等呈稱原任江西鄱陽縣知縣沈衍慶安徽石埭縣人道光乙未科
進士補授江西泰和縣知縣時多惠政調補鄱陽戡吏役鋤豪強聽訟敏決積贖一清郡邑向有溺女之
習沈衍慶廣育嬰堂擇端士董之保嬰命無算夏施藥餌冬散棉衣掩骼埋骨矜恤無告舉凡便民之政
靡利勿興民感之次骨沈衍慶生平頗高性理之學拓芝陽書院暇則進諸生講肄之士風丕變鄱濱巨
湖盜賊出沒其間沈衍慶增哨船嚴督捕屢獲劇盜置諸法境內肅然二十八九年大水城鄉民舍皆
沒民跨樓頂屋脊若鐵鷗每風濤振蕩呼救之聲四起沈衍慶擇高阜結棚為徙居焉其不能徙者作併
何棹小艇親散之城巾四門分設粥廠日乘扁舟往來疾風駭浪間拊循督察胥隸不能為奸衣忘澆食
忘飽始終不懈前後存活數十萬人以治行稱最咸豐元年卓異引 見回任民如重獲慈母閭巷相慶
三年粵逆犯江境沈衍慶閉結壯丁豫為訓練防備五月南昌圍急前撫臣張曾敝調援省率眾即行會
總兵馬濟美陣亡賊勢張甚沈衍慶會合省防各軍力戰大破之轉敗為勝斬獲甚夥七月偵知賊將東
竄沈衍慶恐賊乘虛襲鄱請於張曾問道馳歸為守禦計先是沈衍慶援省饒州守關樂平令李仁元有
禦侮才調攝鄱篆李仁元河南濟源縣人弱冠成進士咸豐二年選授樂平縣居官勤職以廉能稱樂平

民風剽悍國狼以禮讓化之隨在耳提而命勸導諄誠民多感悟殲殺之風漸息時粵逆鷓張李仁元義形於色囚募民之健者得數百人束以行伍常有請繼殺賊之志迨攝郡篆凡沈衍慶便民之惠政踵而行之時論以沈李並稱其年七月沈衍慶馳疏索印籌防李仁元曰賊旦夕且至臨敵易令以我爲怯也避難苟免君子恥之印不可得沈衍慶爭之甚力仍靳不予定議並力戰守乃予印兩人相倚如左右手擐甲厲兵共商守備儼郡城垣被水冲塌時復久雨湖漲城內外水深數尺無險可據審度地勢沈衍慶營於高門李仁元扼守北門爲犄角勢經營一晝夜而賊帆大至我軍燃巨礮碎賊艦斃賊數十賊繞逼東門沈衍慶迎擊殺賊十餘人手斬黃衣賊勳其首賊稍卻潮流至黃龍廟登陸分股一由東門入一由北門入李仁元憤怒巷戰賊有物禮卒以衆寡不敵爲賊所困然李仁元強張空拳奮髮指批裂勇氣百倍適一賊橫衝而過矛刺其背刃出於胸遂踏地賊嚙削之體無完膚被害極慘沈衍慶方遇東門之賊身已被創聞失李仁元仰天大慟知事不可爲益發憤力戰死之所部從難者三百餘人家丁梅高熊升皆殉時七月十四日也逾旬日賊退獲其尸貌如生妻衣偏鈴鄱陽縣印賊旋陷樂平李仁元之父李予埤弟誠元妹二姑及使女二人皆罵賊被害母陳氏妻金氏妾楊氏妹大姑四姑僕李趙氏皆仰藥投井畢命全家盡繼一門忠烈業經前撫臣張滂奏奉 諭旨優卹沈衍慶贈道銜李仁元贈知府銜均

入祀昭忠祠予祭葬給雲騎尉世職並於鄱陽樂平兩縣各建專祠各在案竊維沈衍慶李仁元政績有古循吏風死事有古烈士風紳民等追念遺愛不忍沒其治行呈乞奏請編入循吏傳並援照江西陣亡候選知府劉騰鶴補用直隸州知州劉騰鴻予諡成案籲懇 賜諡等情前來臣查同治二年十一月二十四日奉 上諭祁濟漢奏與盜安民必資循吏請分別表彰錄用一摺嗣後各省大吏務宜加意訪查其有政績官聲遺澤在人者著奏明宣付史館編入循吏列傳等因欽此今該故員沈衍慶作宰鄱陽政治爲通省之冠故員李仁元先治樂平繼攝郡邑政聲與沈衍慶後先媲美時人方以漢之呂偃臣杜詩追賊犯饒郡沈衍慶自省遍誦李仁元効死勿去同心戮力戰沒孤城時人方以唐之張巡許遠跡其生平治績節行似不爲過至今父老言之猶爲泣數行下洵屬循良第一忠義成雙合無仰懇 天恩俯准宣付史館編入循吏列傳至於易名之典出自 殊恩非臣下所敢擅擬如蒙 特旨予諡褒旌顯忠風厲天下似於吏治人心兩有裨益 上諭劉秉璋奏已故知縣政績卓著死事最烈請旨宣付史館籲懇 賜諡一摺已故江西鄱陽縣知縣沈衍慶署鄱陽縣事樂平縣知縣李仁元前於咸豐三年七月同在鄱陽縣禦賊陣亡業經奉 旨優卹建祠茲據奏稱該故員等治行極最遺愛在民力守縣城死事慘烈該縣紳民呈請奏懇恩施等語著照所請將該故員等事實宣付國史館編入循吏列傳以彰忠節而順輿

情至應否予諱之處著禮部議奏○丙戌內閣學士周壽昌以病免○調勒方錡為江蘇布政使以范梁為廣西布政使黎兆棠為直隸按察使○周敬銘曾國荃奏督省成災州縣已有八十餘邑之多待賑饑民計逾五六百萬之衆屢蒙 朝廷頒米頒銀祇以不敷分布 國荃奏請將江鄂未提之漕米六萬石撥給山西放賑奉 旨戶部議奏欽此嗣經戶部議覆以京倉根本重地正當多儲稍儲以備緩急若將江鄂漕米再行撥給山西則京倉益形虧短所有江鄂漕米仍照舊運京以重積儲而固根本該撫所請全數撥歸山西之處應毋庸議奉 旨依議欽此咨行到晉 臣等細釋部 臣所議係為慎重倉儲維持根本所見甚大持論甚平 臣等至愚極陋何敢再申無厭之請惟 臣敬銘奉 命周歷災區往來二三千里目之所見皆係餓殍形耳之所聞無非男啼女哭冬令北風怒號林谷冰凍一日再食尙不能以禦寒徹旦久饑更復何以度活甚至枯骸塞途繞車而過殍喘呼救望地而僵統計一省之內每日餓斃何止千人目覩慘狀夙夜憂懼寢不成眠食不甘味者已累月 臣等萬分迫切不能不瀝陳於 聖明之前者也論者謂既免米盤商販自可源源入境殊不知道路艱險平時僅恃陝豫商販接濟以其地近省地注稍易今則陝豫面面皆災來源已早竭矣出示招徠無一應者直隸督 臣李鴻章為平糶之議以救晉民山西屬之獲鹿運晉屬之什貼卽用輪船局委員一力承辦名為招商實與官運無殊此外別無富商

大賈捆載而來也況平糶與放賑本係兩事平糶者所以救次貧之民不虞於溝壑也放賑者所以救極貧之民使不卽於餓殍也平糶價雖較賤然必有錢之人乃能購買得食至於 天恩所賜之賑糧則擇窮苦無告者予之倘非極貧次貧不能濫入冊籍恐賑濟不能徧及故以平糶濟賑務之窮非謂有平糶而賑糧卽可少緩也論者又謂官辦之糧有限商運之糧無窮此僅爲中等戶口設法殆未及極貧次貧者然計耳設局開捐原爲廣籌賑糧藉裕民食起見惟管中富饒之區僅輸次平適太谷祁縣介休等縣雖經委員敦切勸導然該富戶各保各村已逾三載莫不力盡筋疲力竭以本處富戶之銀先救本地鄉民之死必待有餘乃可協濟鄰邑其力能自了者不過七八州縣此外都無餘資可以分潤至於各郡瘠苦之縣或百里而無一富室或數十里而無一小康之家專仗官爲賑濟爲民父母又豈忍奪甲村到口之食而飽乙村饑民之腹此捐輸不能統收而分勻之實在情形也省南一帶伏莽多矣西則界連韓浦刀客之嘯聚靡常東則錯處修濟島徒之揭竿疊起節逾大害寸澤未澍來春荒象更有不堪設想者臣等所以屢乞 恩施孜孜不已者一則爲民請命冀救垂斃之殘黎一則爲 國宣仁思弭未形之隱患伏乞 皇太后 皇上俯念管省饑民倒斃日多地方可憂更乞特降 諭旨俯允將江鄂未提之漕米六萬石全數撥給山西以救殘黎而維人心得 旨著照所請准將江鄂未提漕米六萬石全數撥給山西

以資賑濟戶部知道○庚寅以恭修 玉牒告成予戶部員外郎福釗等升叙有差○沈葆楨因病奏請
開缺得 旨著賞假兩箇月○加賞資善堂小米二百石○辛卯諭前據崇綺等奏河南饑民遮道呈訴
豪戶朦蔽勒捐並懇求蠲緩等節當經諭令李慶翱訪察嚴查弊端茲據御史李嘉樂奏所有私徵勒捐
各縣請飭詳核嚴參一摺自係爲認真賑務起見李鶴年即將崇綺等接收各呈詳加查核其湯陰等縣
如何違例私徵及聽從朦蔽勒捐倘有劣跡卽行查取職名及失察之該管上司分別參辦並著追查各
屬如有盡心賑務者自應予激勸所劣之員隨時懲儆務期掃除積習以衛民生至防弊各條卽著通
飭做照山西辦理毋得虛應故事另片奏州縣陋習請飭禁革等語州縣身在地方宜如何守法奉公潔
清自矢若如所奏僥送上司節節規規每年所費銀以千兩計藉拜年爲詞意存干請各節實堪痛恨該
省如有前項陋習卽著該撫嚴參懲辦該撫及藩臬大員尤當廉隅自勵表率屬僚庶幾整飭官常吏治
日有起色○甲午 上詣 大高殿祈雪○戊戌左宗棠奏吐魯番魯克沁回子郡王統轄二品台吉四
員其台吉向由該王選擇賢能報候吐魯番領隊大臣奏獎本年三月吐魯番城克復魯克沁回子郡王
早經病故台吉俱歿回部辦事無人諸多不便統領嵩武軍廣東陸路提督張曜據各標回公舉邁引哲
辦台吉事務呈請給委前來由 臣繕給委牌飭令邁引哲辦台吉事務察看如果棋勝委用再行奏獎允

之○已亥諭巡視南城御史顏嗣洪等奏官紳捐辦崇善堂百善堂棲息窮民經費不敷懇恩賞撥米石一摺南城清化寺街崇善堂北城梁家園百善堂二處俱設緩廩於每年冬令收養貧民俾資棲息加恩著照所請自本年爲始每年賞給該二處小米各三百石以濟窮黎○辛丑諭順天府奏趙村鮑家莊兩處分設粥廠撥案懇請賞給米石等語本年糧價昂貴貧民謀食維艱加恩著照所請所有趙村鮑家莊兩處粥廠每月賞給粟米一百二十石以來年正月爲始俟禮賢等四鎮粥廠停止時一併停止○諭本年山西河南兩省被災極重朝廷迭經裁漕發帑賑卹窮黎而宵旰焦思無時或釋現屆冬深京畿尙少雪澤該兩省疆臣奏報得雪分寸不等亦未一律深透以後祥災善被春麥卽有補種之處而轉瞬卽屆上忙以饑饉餘生再事催科深虞民力有所不逮所有山西河南兩省成災州縣應徵光緒四年上忙正雜錢糧著暫行蠲免以紓民力各該撫卽刊刻謄黃徧行曉諭倘有吏胥等從中隱匿稍有弊端卽行從嚴懲辦用副軫念災區有加無已至意○御史鄧慶麟奏山西亢旱成災閩境錢糧蒙恩概予蠲緩地方維正惟賴鹽課爲一大宗而山西各州縣辦理鹽務未能畫一有暢銷之區亦有滯銷之處因有私鹽充斥而官鹽於以滯銷亦有領運官鹽夾帶餘鹽過多充斥正鹽以致引鹽不能暢銷此其弊在地方官招商辦運不得其人故也查山西運鹽舊章向歸官運官銷以濟民食蓋鹽歸官運則價酌其平必不

肯與民爭利致滋事端而額引有定地方官自顧考成萬不肯任私鹽充斥致正引銷不足額此官運官
銷裕 國便民之最善也無如各州縣履任後因政務殷繁勢難兼顧往往招商領運官則坐擁虛名盡
由商人把持舞弊而鹽政於以大壞緣辦運之商非地方刁紳劣監卽市僧奸商湊集資本夥謀朋充勾
結鹽場各官聯爲一氣漁利分肥弊端不勝枚舉其承運正鹽每引三萬斤應加餘鹽三千斤以爲銷耗
之費此定章也而鹽商舞弊手眼每引加帶餘鹽七八千斤不等正引愈多餘鹽愈廣其甚者餘鹽夾帶
較正鹽則有三分之一鹽商先買餘鹽希圖利己而正引之鹽所售無幾則謂之滯銷此餘鹽充斥有礙
正引以病官也每鹽一斤制錢三十五文而鹽秤始則十四兩爲一斤近則十二兩爲一斤加以泥水攪
和實則不過六七兩百姓忍氣吞聲無如之何此泥鹽短斤以病民也聞近來山西州縣中惟鳳寧縣知
縣賴令到任卽循定章官運官銷乾鹽足秤不假商人之手百姓頌聲載道亦無私鹽充斥情弊又署陽
城縣知縣胡令因紳士呈控鹽商以短斤泥鹽出賣深爲民害並查明領運正鹽有夾帶餘鹽等弊將鹽
商徐得瑞懲責督令書差以乾鹽足秤售賣每日銷鹽不下萬斤罔屬感頌而額引於以暢銷所謂有治
法尤貴有治人也夫巡緝私鹽例有明文而各州縣之私鹽仍是鹽場之官鹽奸商設計取巧充斥正鹽
匿課肥己其弊伊於胡底相應請 旨飭下山西巡撫查照舊章仍歸官運官銷不准招商辦鹽庶引鹽

不至滯銷私鹽悉歸正課而官民亦不至交困下戶部議奏○壬寅諭奉天府丞王家楹奏前任山西
藩司林壽圖以紊亂例章奉旨革職雖係林壽圖未能詳查全案雖保非該司書吏畏其精明隱匿復
要件不行呈圖有心傾陷請飭山西巡撫查明嚴辦等語書吏於應行呈圖案件如敢任意捺摺傾陷本
官刁風斷不可長著各直省督撫一體嚴查以杜弊端至林壽圖業經革職不得藉此爲開脫地步王家
楹所請飭下山西巡撫查明戶部覆文之處著毋庸議○諭奉天府府丞王家楹奏請飭實缺人員各歸
本任並飭部嚴定委署章程等語府屬州縣實缺人員必須久於其任於地方利弊實力講求方有裨益
近來紛紛更調流弊滋多著各直省督撫於實缺府屬州縣飭令各回本任如果不能稱職卽行嚴參開
缺不得率行調署並著吏部申明委署章程通行遵照以肅吏治○先是御史胡聘之奏查北五省向多
開設燒鍋以酒爲業如山西之汾酒直隸之高梁酒其名爲最著然多一造酒之家卽多一糜穀之所妨
礙民食實非淺鮮原伏讀乾隆二年五月 上諭養民之政多端而莫先於儲備夫欲使粟穀有餘必先
去其耗穀之事而耗穀之尤甚者則莫如燒酒燒酒之盛行則莫如河北五省今卽一州一邑而計之歲
耗穀米少者萬餘石多者數萬石不等則禁止之後通計五省所存之穀已千餘萬石矣雖有穀之家不
能皆分所有以周貧乏而所存之穀自在民間可以通融接濟朕器之者已熟五省燒鍋一事當永行嚴

禁等因仰見 聖慮周詳所以爲小民謀終歲之蓄者至深遠也是以違禁私燒照違制律杖一百廢收

新麥晒熟開燒者杖一百枷號兩月地方官失察分別降留降調定例本極嚴密自咸豐年間戶部始奏准發照抽收燒鍋稅銀然開每照一張歲收銀僅三十餘兩所入甚微而部照一發則影射包庇百弊叢生一縣或多至數十家或百餘家不等地方官吏私受規費不肯認真嚴禁於是私酷皆變爲官酷矣臣風聞順直所屬各州縣私燒不下數千家歲耗糧米爲止數百萬石一省如此他省可知近年來糧食日少糧價日昂者其弊實不外此現值亢旱歉收小民乏食各處辦理平糶賑飢皆苦無糧可買輾轉購運費盡周章而於目前消耗民食之最鉅者未能設法杜絕非救荒之善者也應請 旨飭下順天府尹直隸總督河南山東山西陝西各巡撫嚴飭地方官查明境內所設燒鍋一律禁止敢有違禁私燒者立即嚴拿按律懲辦如有地方官貪受陋規不肯認真嚴禁一經查出立予參處卽有照之家亦令概行繳照停燒俟年穀順成再爲酌量發給如此嚴杜消耗將見地方糧米日見其多庶幾市價可平而民食可裕矣得 旨戶部議奏至是李鴻章又奏直境糧價昂固由秋成歉薄亦因耗費太甚通省燒鍋約計千餘家每日需用高粱兩萬餘石每月共需六七十萬石卽以每人日食一升而論該燒鍋等一日之費已佔二百數十萬人之食境內及外來之糧往往被其購用遂致民食缺乏雖招徠遠近商販源源運糧價

不能平糶不遵化宣化順天各屬燒鍋最多其在承運者並用海船自赴奉省大宗採買今直督張區
皆指奉糧接濟勢難任其爭購夫酒可終年不用日不再食則飢輕重原有別該燒鍋等每歲應交課
銀統共不過三萬餘兩所益於庫款者有限而佔奪窮民口食貽害於閭閻者實深自來荒政本有禁酒
之條山西近已奉 諭飭禁燒鍋直省爲畿疆重地際此糧價日增民生困苦吏宜會緩就急應請除熟
河承德府歲豐等縣可勿置議外凡順直各屬燒鍋自明年正月起暫行停燒以濟民食俟秋成豐稔後
仍准開燒依額納稅如蒙 俞允卽由 臣出示曉諭禁止儼有限內私燒照例治罪並通飭地方官秉公
查察不准胥役得規包庇或藉端擾索違則從嚴參辦分別重懲 上諭李鴻章奏直順各屬請暫停燒
鍋等語著戶部彙入御史胡聘之摺一併議奏○甲辰 上詣 大高殿行禮○乙巳劉秉璋奏 臣承准
軍機大臣字寄光緒三年九月初四日奉 上諭李鴻章奏奉撥管豫兩省賑糧請變通辦理一摺等因
欽此 臣伏查江西漕糧因民困未蘇仍難徵收本色現經 臣恭摺具奏請 旨俯賜折徵所有前項提辦
晉賑漕糧三萬石自應欽遵 諭旨將購運腳銀兩發交道員朱其昂等趕緊領辦當經轉行糧道按
照向辦海運正耗價腳各數籌款發給爲民厚票號匯解赴滬交道員朱其昂等兌收如數採買務於封
河以前運解到津至此項賑米江西仍照採買成案併計辦理其由津運通銀米各飭朱其昂等報銷時

歸入賑銀收支項下造報以清眉目報聞○丁未諭御史張道淵奏開捐各省弊端甚多請飭嚴禁等語各省開局捐輸本係一時權宜之計若如該御史所陳各省多以執照分交屬員壓派鄉村甚至數十戶認捐一職數百戶報捐一官執照則以有勢力者出名刁生惡監把持作弊名爲零捐病民甚重而應嚴行禁止以杜弊端著各省督撫於設捐處所實力稽查如有力之戶勸令捐輸餘概不准以執照分派各屬按戶零捐如有紳耆把持與官吏通同作弊卽行嚴參懲辦毋稍徇隱○己酉祭 奉先殿遣載澂行禮○是年義大利國使臣歲三多回國博海德繼之○統計全年出口貨值銀六千七百四十四萬五千零二十二兩進口貨值七千三百二十三萬三千八百九十六兩相抵虧五百七十八萬八千八百七十四兩凡徵貨稅銀一千二百零六萬七千零七十八兩

光緒四年戊寅春正月辛亥朔元日節 上至 奉先殿行禮 慈安端裕康慶昭和莊敬皇太后 慈福端佑康頤昭豫莊誠皇太后御慈寧宮 上率諸王大臣等行慶賀禮至 中和殿受禮 太和殿受賀至 大高殿拈香畢至 壽皇殿行禮○甲寅左宗棠奏 臣接據總理行營營務候補三品京卿劉錦棠十月二十七日阿克蘇馳報東四城已復各城保回民就撫安堵如常惟庫車運南沙雅爾回目麻木爾曾充安集延王子巴什之職甘心從逆官軍攻克達坂城時生擒縱歸麻木爾得歸沙雅爾故巢後煽

誘土回及哈密各處客回仍附安集延所設庫車牌色提聽其指嚇比官軍攻克庫車麻木爾挈其黨夥
三四百人潛竄哈密地方哈密在阿克蘇城南運西四百四十里適已蕪撫之寧河滑蹄回目款營來報
同時接前路偵報十月初五哈密又到一股匪回六七百人與麻木爾合勢謀指官軍劉錦棠令提督譚
慎典副將夏辛酉帶馬隊提督席大成戴宏勝帶步隊親率以行十月初八夜三鼓拔隊初九日抵寧河
滑蹄初十日抵巴河偵知賊復竄哈密西五十里屈烏克排非地方河流深闊賊過後船筏均提泊彼岸
劉錦棠令總回顧澆覓路策馬先行馬步繼進洞知賊尙踞原處官軍號鼓齊鳴整隊而前麻木爾嚇衆
麇戰鎗礮環施譚慎典席大成戴宏勝潘長清喬威衝擊賊不能當馬隊中有得識麻木爾者測準開鎗
正中麻木爾面頰山口內穿耳旁出賊衆驚潰劉錦棠揮軍衝殺陣斬悍賊三百餘級生擒數十名其
老幼婦女牲畜則先已散匿林山次日入山搜捕雜沙雅爾老小各屬五百餘名口交隨征回目帶匪沙
雅爾其哈密客回則由營派員解回阿克蘇訊據各回供稱麻木爾受傷斃見數騎擁之穿林鼠竄伊等
不知其下落也劉錦棠派令搜山者無賊蹤乃收隊回阿克蘇正擬分道進兵布置一切忽接南路偵報
求撫回目和闐伯克呢牙斯聞官軍西進遵率所部回家進圖葉爾羌怕夏長子伯克胡里得據葉爾羌
之大通哈飛報即由喀什噶爾帶五千騎赴援葉爾羌彼此搏鬪甚力呢牙斯爲伯克胡里所敗並失和

聞而從前換防官軍守備何步雲旗員英韶等遣漢回聞道來營遞稟急求反正據稱逆回白彥虎九月
底竄至喀什噶爾東北百八十里卡里他亞以兩克地方人不滿百飢疲殊甚惟新據布魯特馬則倍多
於人伯克胡里已由喀什噶爾帶騎賊赴葉爾羌南與呢牙斯戰勝負未分留踞喀什噶爾頭目阿里達
什拒白彥虎不納何步雲英韶率滿漢兵數百人佔據漢城乞發兵救援旋據探報伯克胡里聞官軍
已克庫車引衆向英吉沙爾竄走留人踞和闐何步雲又報佔據漢城後阿里達什遂日攻撲並聞伯克
胡里准白彥虎入喀什噶爾助攻漢城之信劉錦棠統籌西四城局勢原應先取葉爾羌次規喀什噶爾
英吉沙爾惟喀什噶爾兵民反正已據漢城機未可失則先攻喀什噶爾邊城裏賊中央俟張曜全軍取
齊分道并規縱橫掃蕩機局更無不宜遂飭提督余虎恩率步隊三營馬營一起總兵杜錫楨馬隊一營
一起由阿克蘇取道巴爾楚克馬納巴什進爲正兵提督黃萬鵬率旌善馬隊六旗總兵張俊率步隊三
營由烏什取道布魯特邊界進爲奇兵均計道里遠近爲師期先後總以十一月十四日同抵喀什噶爾
爲準兩路均聽余虎恩節制以一事權而巴爾楚克馬納巴什形勢最勝劉錦棠俟兩路啟行後卽親率
馬步各營前往駐紮以扼和闐葉爾羌衝要並便策應前敵之軍一俟張曜全軍取齊屆時協力并規或
合或分自當相機酌辦其由喀什噶爾庫車至庫車并城一路以駐吐魯番之提督易開俊安遠一軍

填防易開倭所遺之托克遜出惠兩處防務以總兵劉鳳清步隊兩營分布駐紮至吐魯番及瞭墩十三間房東通哈密之處則以副標遊擊宋得祿選鋒馬步兵一營總兵夏泰朝守備寶恩驢馬隊兩起前往接防計此時已度戈壁抵哈密而西矣自肅州關以抵吐魯番托克遜以抵庫車皆防事也自庫車至阿克蘇巴爾楚克爲且防且戰之軍自巴爾楚克瑪納巴什以抵喀什噶爾英吉沙爾則主戰之軍常山率然勢成首尾相應數千里一氣卷舒將士心目中皆有全局洞以之象而自庫爾勒以西所歷又皆腴壤天時地氣不殊中土回思關塞荒瘠寒苦勞費艱阻情形蓋居然苦盡甘來人人愾意此足仰舒宵旰憂勤於萬一者惟師行日遠驛道遙邇以後軍報慮難迅速馳遞緣臺站創立諸務紛繁卽書役亦須由關內雇覓供差非若內地有州縣驛丞吏役承辦可即便捷也謹先陳明乞紓 慈慮 上諭軍機大臣等左宗棠奏官軍剿沙雅爾逆回進規喀什噶爾各城並揀委回目署理阿奇木伯克等缺各一摺沙雅爾回目麻木爾挈黨竄踞哈密地方經劉錦棠率軍擊散惟麻木爾受傷竄逸仍著飭令官軍探蹤嚴拿毋任漏網喀什噶爾兵民反正已據漢城逆酋伯克胡里引眾向英吉沙爾竄走而逆黨阿里達什猶敢攻撲漢城且白彥虎亦有竄併助攻之信劉錦棠現已分軍先行進規喀什噶爾當此事機順手之時自不難尅日攻拔一俟張曜全軍到齊卽行相機規取各城次第掃蕩功在垂成尤應穩慎圖維以收

萬全之效伯克胡里既往英吉沙爾竄走又有引白彥虎入喀什噶爾之說設與該逆合併遼窳窮究終爲不了之局左宗棠當飭前敵官軍務將首要各逆設法兜捕就地殲除以覓全功各城投誠纒回隨同官軍打仗出力左宗棠擬給與頂戴暫令署理阿奇木伯克等缺卽著照所請辦理該大臣前有改設行省郡縣之議現在已經收復各城向有辦事及領隊大臣應否簡放之處著卽詳議具奏北路一帶布置事宜著金順隨時與左宗棠妥商辦理將此山六百里各諭令知之○丙辰李瀚章奏湖北武昌縣樊口地方外瀕大江南通梁子等湖袤延八百餘里與江夏大冶等縣接壤同治初年及十三年間據該紳民以樊口港內民屯田地每遇汛漲江水從口灌入卽被淹沒呈請在於港口建築壩閘經前督撫臣曾國先後委員勘明該處築壩建閘窒礙多端稟由武昌府議復樊口長港內通諸湖自港口至黃柏山止計長數十里兩岸原有老堤賴以捍衛後因坍塌致盛漲時江水倒灌低處誠不免被淹然梁子等湖眾流俱匯此港而達於江如建石閘雖足以抵禦倒灌之江水而內湖水漲無路可出泛濫橫溢恐向不被淹之處亦將被淹爲害更大况該處水路內通數邑集鎮糧食貨物皆係船運建築閘壩舟楫不通商旅裹足尤於民食及贖課有礙節次明晰批駁上年前撫臣翁同龢接准武昌等邑紳士由京寄來公函仍中樊口建閘之請又經飭委候補知縣陳蒙前往會縣擬加取勘審度地勢利害該處梁子等湖數百里之

水向由樊口出江別無宣洩之路一經建閣下板堵禦如過大雨時行各湖水無分洩其間沿邊田地必先受淹而夏汛成漲之際內外堤不免沖決爲患委實利少害多批飭不准舉行在案詎有武昌縣廩生郭瑞麟候選訓導胡齊田大冶縣武舉皮周福黃岡縣生員劉玉田於本年春夏間竟敢違禁違強糾家斂費在於樊口地方築壩將河堵塞並私立埠頭抽收船盤把持勒索擾累商民卽經上訪聞札飭各該縣剴切示諭開導勒令平毀乃郭瑞麟等恃衆抗違如故茲據大冶武昌江夏等縣士商民楊鳴遠楊亨葵袁兆麟等紛紛呈由各該縣稟經武昌府知府方大湜查明地方受害及郭瑞麟等藐玩情形開摺繪圖轉請調派礮船營勇會縣將壩創毀嚴拿各首犯究辦等情前來臣查楚北素稱澤國江漢兩水自江夏合流東下汛漲之時勢極洶湧全賴沿江各湖以資分洩樊口爲入梁子等湖之咽喉若將該口堵塞則水無銷路就武昌一邑而言已屬害倍於利若以全省地勢揆之則不獨下游黃梅等縣堤工可慮卽上游各州縣江堤亦必有潰冒沖突之患乃郭瑞麟等膽大妄爲輒敢糾衆強行築壩抗諭不毀並私設營卡勒索商民實屬藐法已極事關通省水利未便稍事姑容隨檄管帶漢陽操防營洋鎗隊提督宋德鴻武昌城守營參將樊國泰酌帶兵勇礮船並委武昌府知府方大湜會同馳往督縣率領兵勇於十一月初八九等日將樊口私壩全行創毀商民莫不稱便查拿郭瑞麟等先已逃避營勇概行撤回酌留礮

船數號暫駐該處會同地方官嚴拿在逃各犯解省審辦嗣後樊口埭築閘壩黃成各該縣隨時稽察每
年冬季將並無違禁私築緣由出結通齋查考以利水道而昭慎重除將郭瑞麟等衣頂分別咨部斥革
一面仍飭勒拿務獲解報備案訊究懲辦外所有辦理情形理合恭摺由驛具奏又奏湖北武昌樊口
地方爲消洩江湖諸水要道前據該處紳民呈請創築閘壩經歷任齊撫臣因受益僅止一隅而害及數
邑且有礙通省水利節次明晰駁飭不准建築上年庫生郭瑞麟等赴縣仍申前請乃前署武昌縣知縣
劉篤慶並不查案切實指駁禁止輒行含混批示以致郭瑞麟等藉口徵費逞強糾眾攔河築壩幾釀事
端實屬不知輕重咎有難辭相應請旨將前署武昌縣事現任監利縣知縣劉篤慶交部嚴加議處以
示懲儆得旨如所請行○戊午加賞通州謝慶賑米二千石○庚申諭劉坤一奏廣西右江鎮右營右
哨千總潘奕勳保升都司請開底缺並請更名承勳飭部註冊著照所請行至該營以潘奕勳原名應做
避廟諱上一字等語恭查道光二十六年三月欽奉諭旨援引二名不偏諱之義將來繼體承緒上
一字毋庸改避亦毋庸缺筆聖訓昭垂著爲會典該營所稱敬避廟諱字樣與前奉諭旨不偏諱
之義不符且奕字係雙分字嗣後仍應毋庸避用以昭畫一該部知道○辛酉祈穀於上帝遣奕隆行
禮○壬戌烏魯木齊都統英翰卒贈卹如例並賞其母銀二千兩人參六兩○癸亥上請奉先殿

壽皇殿行禮○戊辰蒙古都統成明卒 贈卹如例○辛未左宗棠奏 臣接署烏魯木齊提督金運昌
署鎮迪道周崇傳會報烏魯木齊都統英翰於上年六月出關接篆後日驟時艱每以新疆初復之區經
野匪易詢訪民瘼講求吏治籌畫善後事宜籌至徹夜無眠十月初三日忽患瘧疾猶復照常辦事案無
停曠十一月中旬服藥稍瘳遇事躬行裁決仍未少休迨二十三日忽轉痢證晝夜更衣數十遍形神疲
憊病勢增劇十二月初八日自知不起具遺摺屬署提督金運昌恭代陳奏臨終無一語及私惟以 天
恩未報七旬老母侍奉未終爲遺憾延至酉刻出缺并據金運昌續稱故都統由道光乙酉科舉人揀發
安徽歷權劇邑洊升郡守山監司而擢皖撫前後廿年深得民心其於整頓吏治培植人材修復水利勸
課農桑靡不實力經營當苗捻交煽之日直東蹂躪之秋籌餉籌兵尤能力顧大局其他官績雖未盡知
然綜計其生平事業在皖之日最久亦在皖之功最多自成豐十一年調署宿州知州時徧地皆賊故都
統單騎入城布置防守宿境帖然同治二年以生擒張洛刑功擢守潁州是年苗逆復叛攻圍蒙城時以
廬鳳道督蒙亳諸軍駐紮小湖力戰數月遣將入城助守因苗勢愈熾流涕誓師激勵眾志求援僧邸苗
難卒平三年解麻城圍追賊霍境黑石渡時僞王陳德才擁眾數十萬縱橫馳突故都統密遣裨將夜入
賊營說其副賊投誠數日間籌畫遣散安歸田里者數十萬人僞端王藍長睿遂伏冥誅四年夏捻逆大

股由山東回窺亳州雉河集故都統以一軍支拄其間屢戰卻賊賊來愈眾飭諸將堅守勿出自率十二騎突圍調集援軍誓決死戰遂解雉河之圍全淮始安逾年蒙 恩擢授皖撫六年任逆北竄派隊東征共建河防之策迨任逆授首張逆復熾故都統時丁父艱痛哭陳情至再至三旋以賊勢猖獗屢經從戎與湘淮東豫諸軍同心并力籌防運河巨整因而就殄八年仍任皖撫每念時事多艱憂方大勦思練兵講武籌餉裕財諸策其間擒宋景詩楊輔清平廣建之亂賊永固之氛功績之多實難悉數運昌本皖民從軍久歷備部見聞較切用敢備陳懇請具奏前來 臣維烏魯木齊都統 臣英翰山縣令洊擢封圻撫皖最久 臣自移督陝甘僻處西陲雖往來兩廣其稀於英翰皖中政績未悉其詳然擒逆首張洛刑平苗沛霖准南北全境肅清功績昭昭在人耳目餘風未沒猶可稽也上年奉 命補烏魯木齊都統道出肅州與 臣面晤商榷一切知其器膺疆寄閱歷已深於軍事尤為洞達數月以來彼此兩商邊務意見相同臘月初三日英翰力疾寄 臣書親筆一紙具言病劇情形預為訣別詞意尤極哀惋方新覆垂定之時需才孔亟冀獲同心之助永鎮邊陲詎料一病不起遂成永訣聞其老母健在幼兒早殤伴胞弟英詩一人任都侍奉年甫十二此又人事之可傷者合無仰懇 天恩敕部從優議卹 加恩予諡並 飭於皖省建立專祠以昭勞烈出自逾格 鴻慈其上年由金順撥歸定西振武四營已經 臣檄飭金運昌節制調

遣以戎統率都統順任後新募新兵四百已據金運昌呈報撤遣以示撙節 上諭左宗棠奏臚陳故
員勞績懇恩優卹予諡并建立專祠一摺已故烏魯木齊都統英翰山知縣徐攬安徽巡撫掃除逆匪綏
靖地方功績卓著自簡任烏魯木齊都統以來籌辦一切洞達機宜業經降旨從優議卹著加恩予諡並
於安徽省建立專祠以彰忠藎○諭給事中文明奏請飭部每月將道府以下各官應輸何項人員到班
逐一榜示等語著吏部議奏○黎培敬奏前在藩司任內准前撫臣行知接准內務府咨單內開黔省
准進方物糧香硃砂雄黃各色茶等項應即遵照辦理時值軍務甫定出產方物各處被匪蹂躪已久人
烟稀少採辦維艱雖經通飭未克舉行現在地方肅清已歷有年經臣飭令藩司轉飭貴陽府及龍里各
屬設法採辦運省出產既不如前辦理幾同創始臣遂加點驗敬謹裝配齊全派員護解赴京藉由奏事
處呈 進外謹繕清單恭摺具奏報聞○崇厚奏記名提督左寶貴自元年徵調來奉蕩平東溝通溝各
處無不身先士卒卓著戰功卽在奉數年亦皆實心任事備極勤勞此次經奴才等飭派督隊馳赴西路
剿辦建昌朝陽一帶邊匪晝夜趨程不避艱險既能力遇兇鋒卽時撲滅又能相機操縱剿撫兼施似此
曉暢戎機能知大體尤為將領中出色之員奴才等察看該員才堪專閫合無仰懇 天恩可否交軍機
處存記遇有提督總兵缺出請 旨簡放得 旨左寶貴著交軍機處記名遇有提督總兵缺出請旨簡

放○左宗棠奏_臣於上年六月十六日具奏遊 有統籌全局謹將愚慮所及據實密陳一摺七月十七日承准軍機大臣字寄光緒三年七月初二日奉 上諭左宗棠所陳統籌新疆全局自爲一勞永逸之計南路地多饑沃將來全境肅清經理得宜軍食自可就地取資惟目前軍餉支絀若南路一日不平則曠日持久餽戩兵飢亦屬可慮該大臣所稱地不可棄兵不可停非速復腴疆無從著手等語不爲無見著卽督飭將士戮力同心剋期進剿并揆時度勢將如何省費節勞爲新疆計久遠之處與擬改行省郡縣一併通盤籌畫妥議具奏欵此跪誦之餘欵仰無既上年秋後官軍由托克遜吐魯番聯絡西進所有布置一切及餉糧轉運地勢賊蹤_臣已疊次預爲陳奏仰仗 朝廷威福師行迅利連克喀喇沙爾庫車烏什阿克蘇四城劉錦棠派余虎恩武萬鵬等分軍兩路進攻喀什噶爾駐軍於巴爾楚克瑪納爾巴什以扼葉爾羌和闐衝要兼策應前敵之軍均經_臣次陳奏頃據總理行營營務處候補三品京堂劉錦棠十一月十九日葉爾羌馳報已於十七日克復喀什噶爾滿漢兩城復出城追剿竄賊尙未收隊又據張曜稱由阿克蘇先派馬隊三營赴前敵助剿適和闐伯克呢牙斯偕男婦五百餘口由闐道來投爾懇安插_臣批令仍歸和闐收輯部衆劉錦棠用將大概情形馳報卽於二十日率馬步各營繞道英吉沙爾以抵喀什噶爾所有復城殺賊詳細情形俟劉錦棠到喀什具報到_臣當卽籌布上 聞仰紆 慈慮是南

疆地期底定尙久老師糜餉之廣而官軍自克復喀喇沙爾以所歷均是朕疆臣調閱各城米糧布匹銀錢及軍民所需日用百貨價值清單與東南各省腹地相若且有較之內地市價更爲平減者加以經理則利民用裕軍儲膏有攸賴現飭古城巴里坤哈密安西採運局減採停運并將各局分別撤留以示撙節十年艱難苦恨百計經營時虞弗逮者一旦霍然如沈疴之去體也將來軍食就地取資全局既振制用自紓我 皇上保大定功規模宏遠上與 高宗拓地節餉之貽謀若合符節矣惟是新疆擬改行省設郡縣雖久安長治之巨圖然事當創始關繫天下大局非集內外臣工之遠猷深算參考異同則思慮未周籌策容多疎誤且甘肅荒瘠著名所有兵餉全資各省協濟相沿已久 臣前奏請飭戶部將咸豐年間報銷冊籍全分頒發到 臣以憑稽考尙未見到復逐加訪詢及甘省本省鎮迪一道餉需經費每年常額三百二十餘萬兩內外伊犁塔爾巴哈台吐魯番南八城滿綠各營餉需經費約尙需數百十萬兩均係由各省撥解接濟此時雖指西征彙局及各省關專款分解濟用將來應仍復舊額以歸有著合無仰懇 皇上天恩飭下軍機大臣總理各國事務衙門六部九卿及各省督撫 將新疆應否改設行省置郡縣從長計議具奏請 旨並將各省關從前應解甘餉及應解新疆額餉各實數咨部核對行知庶徵臣擬酌損益得有憑藉現在南路八城雖復所有屯戍糧餉暨後一切事宜需用甚繁均由 臣軍餉內挪

勢臣不敢另款請銷各省關遊照部章均解至八成以上臣亦斷不格外請益至如南路朕區全復凡可
爲開源節流計者臣自當殫誠竭慮慎以圖之務求弊去利生以益大局愚昧之見是否有當合併陳明
伏乞 皇太后 皇上聖鑒訓示 上諭左宗棠奏新疆應否改設行省郡縣請飭會議并咨金順揀員
往查交涉事件各摺片據樊葉爾羌及喀什噶爾兩城均已收復和闐回衆亦已投誠劉錦棠已繞道英
吉沙爾以抵喀什噶爾是南路各城即可克期定惟回彥虎係著名首惡斷不可任其漏網此次會否
擒斬倘有遠竄邊外務須趕緊設法捕獲毋任久稽顧及至新疆應否改設行省郡縣事關重大非熟悉
該地方情形難以懸斷此時連令內外大小臣工議奏亦未必確有定見仍著左宗棠詳悉酌度因時制
宜如果改設行省郡縣實有裨於大局卽著將何處應設省分何處分設郡縣及官缺兵制一切需用經
費妥議章程具奏再飭廷臣細心會議候旨定奪該督前請發交咸豐初年陝甘新報銷奏冊各全分
及新報類徵俾辦備功各卷宗著戶部懷遵前旨迅速辦理將各省關從前應解甘餉及應解新報額餉
各數目查明咨照該督核辦毋稍遲緩將此山六百里諭令知之○壬申 大高殿設壇祈雪○沈葆楨
因病奏請開缺不允○何璟奏故福建巡撫王凱奏請入祀福建名宦祠下禮部議奏○庚辰諭御史胡
廷燮奏各省審辦案件玩延成習請飭稽查整頓一摺各省審辦案件自應迅速訊結近來地方官積習

未除任意遲延往往拖累無辜殊屬不成事體著各省督撫嚴飭所屬各州縣於承辦命盜重案及自理詞訟依限迅結並責成該管道府認真督催查按月詳報倘有藉故耽延及任令吏胥濫索情弊卽行據實詳參其各省臬局承辦案件勒限完結以清庶獄○是月命駐英使臣郭嵩焘兼充出使法國欽差大臣